

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

सप्तमकाण्डे चतुर्थः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Contents

7 कृष्ण यजुर्वेदीय तैत्तिरीय संहितायां पद पाठे

सप्तमं काण्डं 4

7.4 सप्तमकाण्डे चतुर्थः प्रश्नः – सत्रकर्मनिरूपणं..... 4

Version Notes

1st Version Number 0.0 dated 30th Nov 2019

2nd and Current Version Number 0.1 dated 31st March 2020

1. This Version replaces earlier version “0.0” dated 30th Nov 2019.
2. We have incorporated TS 7.4 Samhita Vaakya corrections only in this version.

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय संहितायां पद पाठे सप्तमं

काण्डं

7.4 सप्तमकाण्डे चतुर्थः प्रश्नः – सत्रकर्मनिरूपणं

TS 7.4.1.1

बृ॒ह॒स्प॒ति॒र॒काम॑य॒त॒ श्र॒न्मै॑ दे॒वा द॒धी॒र॒न् ग॒च्छे॑यं पु॒रो॒धा॒मि॒ति॒ स
ए॒तं च॒तुर्वि॑ञ्श॒ति॒रा॒त्र-म॑प॒श्य॒त् त॒माऽह॑र॒त् ते॒ना॒य॒ज॒त॒ ततो॑ वै त॒स्मै
श्र॒द्दे॒वा अ॒द॒ध॒ता॒ग॒च्छ॑त् पु॒रो॒धां य॑ ए॒वं वि॒द्वा॒ऽस-
श्च॒तुर्वि॑ञ्श॒ति॒रा॒त्रमा॑स॒ते श्र॒द्दे॒भ्यो म॒नु॒ष्या॑ द॒ध॒ते ग॒च्छ॑न्ति पु॒रो॒धां
ज्यो॒ति॒र्गौ॒रायु॑रि॒ति त्र्य॒हा भ॑व॒न्ती॒यं वा॑व ज्यो॒ति॒र॒न्त॒रि॒क्षं
गौ॒र॒सा॒वायु॑ - [] 1

TS 7.4.1.1 - Padam

बृ॒ह॒स्प॒तिः॑ । अ॒का॒म॒य॒त॒ । श्र॒त् । मे॒ । दे॒वाः॑ । द॒धी॒र॒न् । ग॒च्छे॒य॒म् ।
पु॒रो॒धा॒मि॒ति॑ पु॒रः॑ – धा॒म् । इति॑ । सः॑ । ए॒त॒म् ।
च॒तु॒र्वि॒ंश॒ति॒रा॒त्र॒मि॒ति॑ च॒तु॒र्वि॒ंश॒ति॑ – रा॒त्र॒म् । अ॒प॒श्य॒त् । त॒म् ।
ए॒ति॑ । अ॒हर॒त् । ते॒न॑ । अ॒य॒ज॒त॒ । त॒तः॑ । वै । त॒स्मै॑ ॥ श्र॒त् । दे॒वाः॑ ।
अ॒द॒ध॒त॒ । अ॒ग॒च्छ॒त् । पु॒रो॒धा॒मि॒ति॑ पु॒रः॑ – धा॒म् । ये॒ । ए॒व॒म् ।
वि॒द्वा॒ं॒सः॑ । च॒तु॒र्वि॒ंश॒ति॒रा॒त्र॒मि॒ति॑ च॒तु॒र्वि॒ंश॒ति॑ – रा॒त्र॒म् । आ॒स॒ते॑ ।
श्र॒त् । ए॒भ्यः॑ । म॒नु॒ष्याः॑ ॥ द॒ध॒ते॑ । ग॒च्छ॒न्ति॑ । पु॒रो॒धा॒मि॒ति॑ पु॒रः॑ – धा॒म् ।
ज्यो॒तिः॑ । गौः॑ । आ॒युः॑ । इति॑ । त्र्य॒हा इति॑ त्रि॑ – अ॒हाः॑ । भ॒व॒न्ति॑ ।
इ॒य॒म् । वा॒व । ज्यो॒तिः॑ । अ॒न्त॒रि॒क्ष॒म् । गौः॑ । अ॒सौ । आ॒युः॑ । 1 (50)

TS 7.4.1.2

– रि॒मा॒ने॒व॒ लो॒का॒न॒भ्या॒रो॒ह॒न्त्य॒भि॒ पूर्॒वं त्र्य॒हा भ॒व॒न्त्य॒भि॒पूर्॒व॒मे॒व सु॒व॒र्गं
ँ लो॒क॒म॒भ्या॒रो॒ह॒न्त्य॒स॒त्रं॑ ॥ वा॒ ए॒त॒द् – य॒द॒छ॒न्दो॒मं॑ ॥ य॒च्छ॒न्दो॒मा॒ भ॒व॒न्ति॑ ते॒न॑
स॒त्रं दे॒व॒ता॒ ए॒व पृ॒ष्ठै॒र॒व रु॒न्ध॒ते॑ प॒शू॒ञ्छ॒न्दो॒मै॒रो॒जो॒ वै वी॒र्यं॑ पृ॒ष्ठानि॑

प॒शवः॑ छ॒न्दो॒मा ओज॑स्ये॒व वी॒र्ये॑ प॒शुषु॑ प्र॒ति ति॑ष्ठन्ति बृ॒हद्-
रथ॑न्तरा॒भ्यां॑ य॒न्ती॒यं वा॑व रथ॑न्तर॒मसौ॑ बृ॒हदा॒भ्यामे॒व - [] 2

TS 7.4.1.2 - Padam

इ॒मान् । ए॒व । लो॒कान् । अ॒भ्यारो॑ह॒न्तीत्य॑भि - आ॒रोह॑न्ति ।
अ॒भिपूर्व॑मित्य॑भि - पूर्॒वम् । त्र्य॒हा इति॑ त्रि - अ॒हाः । भ॒वन्ति॑ ।
अ॒भिपूर्व॑मित्य॑भि - पूर्॒वम् । ए॒व । सु॒वर्ग॑मिति॑ सु॒वः - गम् ।
लो॒कम् । अ॒भ्यारो॑ह॒न्तीत्य॑भि - आ॒रोह॑न्ति । अ॒सत्र॑म् । वै । ए॒तत् ।
यत् । अ॒छ॒न्दो॒ममि॑त्य॒छन्दः॑-मम् । यत् । छ॒न्दो॒मा इति॑ छ॒न्दः - माः ।
भ॒वन्ति॑ । ते॒न । स॒त्रम् । दे॒वताः॑ । ए॒व । पृ॒ष्ठैः । अ॒वेति॑ । रु॒न्ध॒ते ।
प॒शून् । छ॒न्दो॒मैरि॑ति॒ छन्दः॑-मैः । ओजः॑ । वै । वी॒र्य॑म् । पृ॒ष्ठानि॑ ।
प॒शवः॑ । छ॒न्दो॒मा इति॑ छ॒न्दः - माः । ओज॑सि । ए॒व । वी॒र्ये॑ ।
प॒शुषु॑ । प्र॒तीति॑ । ति॒ष्ठन्ति॑ । बृ॒हद् रथ॑न्तरा॒भ्यामि॑ति
बृ॒हत् - रथ॑न्तरा॒भ्याम् । य॒न्ति॑ । इ॒यम् । वा॒व ।
रथ॑न्तर॒मिति॑ रथं - त॒रम् । अ॒सौ । बृ॒हत् । आ॒भ्याम् । ए॒व । 2 (50)

TS 7.4.1.3

यन्त्यथो॑ अनयो॑रेव॒ प्रति॑ तिष्ठन्त्ये॒ते वै य॒ज्ञस्या॑ञ्जसाय॑नी सु॒ती
ताभ्या॑मेव सु॒वर्गं॑ लो॒कं य॑न्ति चतुर्वि॑ञ्शतिरा॒त्रो भ॑वति
चतुर्वि॑ञ्शतिर॒र्धमा॑साः सँव॑त्सरः सँव॑त्सरः सु॒वर्गो लो॒कः
सँव॑त्सर ए॒व सु॒वर्गे लो॒के प्रति॑ तिष्ठन्त्यथो॑ चतुर्वि॑ञ्शत्यक्षरा
गाय॑त्री गाय॑त्री ब्रह्मव॑र्चसं गाय॑त्रियै॒व ब्रह्मव॑र्चसम॒व रु॑न्धते
ऽतिरा॑त्राव॒भितो॑ भवतो ब्रह्मव॑र्चसस्य॒ परिगृ॑हीत्यै ॥ 3

TS 7.4.1.3 - Padam

य॒न्ति । अथो॑ इति॑ । अ॒नयोः॑ । ए॒व । प्रती॑ति । तिष्ठ॑न्ति । ए॒ते इति॑ ।
वै । य॒ज्ञस्य॑ । अ॒ञ्जसा॑यनी इत्यञ्जसा – अ॒यनी । सु॒ती इति॑ ।
ताभ्या॑म् । ए॒व । सु॒वर्गमि॑ति सु॒वः – गम् । लो॒कम् । य॒न्ति ।
चतुर्वि॑ञ्शतिरा॒त्र इति॑ चतुर्वि॑ञ्शति – रा॒त्रः । भ॒वति॑ ।
चतुर्वि॑ञ्शतिरि॒ति चतुः॑ – वि॒ञ्शतिः॑ ।
अ॒र्धमा॑सा इत्य॒र्ध – मा॒साः ।
सँव॑त्सर इति॑ सं – व॒त्सरः॑ । सँव॑त्सर इति॑ सं – व॒त्सरः॑ ।

सु॒वर्ग॑ इति॑ सुवः – गः । लो॒कः । सँ॒व॒थ्स॒र इति॑ सं – व॒थ्स॒रे ।
ए॒व । सु॒वर्ग॑ इति॑ सुवः – गे । लो॒के । प्र॒तीति॑ । ति॒ष्ठन्ति॑ ।
अथो॒ इति॑ । चतु॑र्विंशत्यक्ष॒रेति॑ चतु॑र्विंशति – अ॒क्ष॒रा । गा॒य॒त्री ।
गा॒य॒त्री । ब्र॒ह्मव॑र्चसमि॒ति ब्र॒ह्म – व॒र्च॒सम् । गा॒य॒त्रि॒या । ए॒व ।
ब्र॒ह्मव॑र्चसमि॒ति ब्र॒ह्म – व॒र्च॒सम् । अ॒वेति॑ । रु॒न्ध॒ते ।
अ॒ति॒रा॒त्रा॒वि॒त्यति॑ – रा॒त्रौ । अ॒भि॒तः । भ॒व॒तः । ब्र॒ह्मव॑र्चसस्येति॑
ब्र॒ह्म – व॒र्च॒सस्य॑ । परि॑गृही॒त्या इति॑ परि – गृ॒ही॒त्यै ॥ 3 (45)

(अ॒सा॒वा॒यु – रा॒भ्यामे॒व – पञ्च॑चत्वारिंशच्च) (A1)

TS 7.4.2.1

यथा॒ वै म॑नु॒ष्या॒ ए॒वं दे॒वा अ॒ग्र आ॒सन् ते॑ऽकामयन्ताव॒र्तिं पा॒प्मानं॑
मृ॒त्युम॑प॒हत्य॒ दै॒वीँ सँ॒स॒दं ग॒च्छेमे॒ति त ए॒तं च॑तुर्विंशतिरा॒त्र–
म॑पश्यन् तमा॒ऽह॒रन् ते॑नायजन्त॒ ततो॒ वै ते॑ऽव॒र्तिं पा॒प्मानं॑ मृ॒त्युम॑प॒हत्य॒
दै॒वीँ सँ॒स॒दम॑गच्छन्. य ए॒वं वि॒द्वाँस॑–श्चतुर्विंशतिरा॒त्र–
मा॒स॒तेऽव॑र्तिमे॒व पा॒प्मानं॑–म॒प॒हत्य॒ श्रि॒यं ग॒च्छन्ति॑ श्रीर्.हि
म॑नु॒ष्यस्य॑ – [] 4

TS 7.4.2.1 - Padam

यथा॑ । वै॑ । म॒नु॒ष्याः॑ । ए॒वम् । दे॒वाः॑ । अ॒ग्रे॑ । आ॒स॒न् । ते॑ ।
अ॒काम॑यन्त । अ॒वर्ति॑म् । पा॒प्मान॑म् । मृ॒त्युम् । अ॒प॒ह॒त्येत्य॑प-ह॒त्य ।
दै॒वीम् । स॒ꣳस॒दमि॑ति सं - स॒दम् । ग॒च्छे॒म । इति॑ । ते॑ । ए॒तम् ।
चतु॑र्वि॒ꣳश॒तिरा॒त्रमि॑ति चतु॑र्वि॒ꣳश॒ति - रा॒त्रम् । अ॒प॒श्य॒न् । तम् ।
एति॑ । अ॒हर॒न् । तेन॑ । अ॒य॒ज॒न्त । ततः॑ । वै॑ । ते॑ । अ॒वर्ति॑म् ।
पा॒प्मान॑म् । मृ॒त्युम् । अ॒प॒ह॒त्येत्य॑प- ह॒त्य । दै॒वीम् ।
स॒ꣳस॒दमि॑ति सं - स॒दम् । अ॒ग॒च्छ॒न् । ये॑ । ए॒वम् । वि॒द्वाꣳसः॑ ।
चतु॑र्वि॒ꣳश॒तिरा॒त्रमि॑ति चतु॑र्वि॒ꣳश॒ति - रा॒त्रम् । आ॒स॒ते । अ॒वर्ति॑म् ।
ए॒व । पा॒प्मान॑म् । अ॒प॒ह॒त्येत्य॑प- ह॒त्य । श्रि॒यम् । ग॒च्छ॒न्ति । श्रीः॑ ।
हि॑ । म॒नु॒ष्य॑स्य । 4 (50)

TS 7.4.2.2

दै॒वी स॒ꣳस॒ज्ज्यो॑तिरतिरा॒त्रो भ॑वति सु॒व॒र्गस्य॑ लो॒कस्या॑नु॒ख्या॒त्यै
पृ॒ष्ठ्यः॑ ष॒ड॒हो भ॑वति ष॒ड् वा ऋ॒तवः॑ सँव॒थ्स॒रस्तं॑ मा॒सा अ॒र्धमा॑सा
ऋ॒तवः॑ प्र॒वि॒श्य दै॒वीꣳ स॒ꣳस॒दम॑गच्छन्. य ए॒वं वि॒द्वाꣳस-

श्चतुर्विंशतिरात्रमासते सँवथ्सरमेव प्रविश्य वस्यसीं सँसदं
गच्छन्ति त्रयस्त्रयस्त्रिंशा अवस्ताद्-भवन्ति त्रयस्त्रयस्त्रिंशाः
परस्तात् त्रयस्त्रिंशैरेवोभयतो ऽवर्ति पाप्मानमपहत्य दैवीं सँसदं
मद्ध्यतो – [] 5

TS 7.4.2.2 - Padam

दैवी । सँसदिति सं – सत् । ज्योतिः । अतिरात्र इत्यति – रात्रः ।
भवति । सुवर्गस्येति सुवः – गस्य । लोकस्य । अनुख्यात्या
इत्यनु – ख्यात्यै । पृष्ठ्यः । षडह इति षट् – अहः । भवति । षट् ।
वै । ऋतवः । सँवथ्सर इति सं – वथ्सरः । तम् । मासाः ।
अर्द्धमासा इत्यर्द्ध – मासाः । ऋतवः । प्रविश्येति प्र – विश्य ।
दैवीम् । सँसदमिति सं – सदम् । अगच्छन् । ये । एवम् ।
विद्वांसः । चतुर्विंशतिरात्रमिति चतुर्विंशति – रात्रम् । आसते ।
सँवथ्सरमिति सं – वथ्सरम् । एव । प्रविश्येति प्र – विश्य ।
वस्यसीम् । सँसदमिति सं – सदम् । गच्छन्ति । त्रयः ।
त्रयस्त्रिंशा इति त्रयः – त्रिंशाः । अवस्तात् । भवन्ति । त्रयः ।

त्रयस्त्रि॒ंशा इति॑ त्रय – त्रि॒ंशाः । परस्तात्॑ ।

त्रयस्त्रि॒ंशैरिति॑ त्रयः – त्रि॒ंशैः । ए॒व । उ॒भयतः॑ । अ॒वर्ति॑म् ।

पाप्मान॑म् । अ॒प॒ह॒त्येत्य॑प – ह॒त्य । दैवी॑म् ।

स॒ं॒स॒दमिति॑ सं – स॒दम् । म॒द्ध्यतः॑ । 5 (50)

TS 7.4.2.3

गच्छ॑न्ति पृ॒ष्ठानि॑ हि दैवी॑ स॒ं॒स॒ज्जामि॑ वा ए॒तत् कु॑र्वन्ति॒ यत्
त्रय॑स्त्रयस्त्रि॒ंशा अ॒न्व॒ञ्चो म॒द्ध्येऽनि॑रुक्तो भवति॒ तेना॒जाम्यू॒र्ध्वानि॑
पृ॒ष्ठानि॑ भवन्त्यू॒र्ध्वाः छ॒न्दो॒मा उ॒भाभ्या॑ं रू॒पाभ्या॑ं सु॒वर्गं लो॒कं
य॒न्त्यस॑त्रं वा ए॒तद्-यद॑छ॒न्दोमं॑ य॒च्छ॒न्दो॒मा भव॑न्ति तेन॒ स॒त्रं दे॒वता॑
ए॒व पृ॒ष्ठैर॑व रुन्धते प॒शूञ्छ॒न्दोमै॑रोजो वै वी॒र्यं॑ पृ॒ष्ठानि॑ प॒शवः॑- [] 6

TS 7.4.2.3 - Padam

गच्छ॑न्ति । पृ॒ष्ठानि॑ । हि । दैवी॑ । स॒ं॒स॒दमिति॑ सं – स॒त् । जा॒मि ।

वै । ए॒तत् । कु॑र्वन्ति॒ यत् । त्रयः॑ । त्रय॑स्त्रि॒ंशा इति॑

त्रयः-स्त्रि॒ंशाः । अ॒न्व॒ञ्चः । म॒द्ध्ये॑ । अ॒नि॒रुक्त॑ इत्य॒निः – उ॒क्तः ।

भव॑ति । तेन॑ । अ॒जा॒मि । ऊ॒र्ध्वानि॑ । पृ॒ष्ठानि॑ । भव॑न्ति । ऊ॒र्ध्वाः ।

छन्दो॑मा इति॑ छन्दः॑ – माः॑ । उ॒भाभ्या॑म् । रू॒पाभ्या॑म् ।
सुव॑र्गमिति॑ सुवः॑ – गम् । लो॒कम् । य॒न्ति । अ॒स॒त्रम् । वै । ए॒तत् ।
यत् । अ॒छन्दो॑ममित्य॑छन्दः॑ – मम् । यत् । छन्दो॑मा इति॑ छन्दः॑ – माः॑ ।
भव॑न्ति । तेन॑ । स॒त्रम् । दे॒वताः॑ । ए॒व । पृ॒ष्ठैः । अ॒वेति॑ । रु॒न्ध॒ते ।
प॒शून् । छन्दो॑मैरिति॑ छन्दः॑ – मैः॑ । ओजः॑ । वै । वी॒र्य॑म् । पृ॒ष्ठानि॑ ।
प॒शवः॑ । 6 (50)

TS 7.4.2.4

छन्दो॑मा ओज॑स्येव वी॒र्ये॑ प॒शुषु॑ प्रति॑ तिष्ठ॑न्ति त्रय॑स्त्रयस्त्रि॒ंशः॑
अ॒वस्ताद्-भव॑न्ति त्रय॑स्त्रयस्त्रि॒ंशः॑ प॒रस्ता॑न्मद्ध्ये॑ पृ॒ष्ठान्युरो॑ वै
त्रय॑स्त्रि॒ंशः॑ आ॒त्मा पृ॒ष्ठान्या॒त्मन॑ ए॒व तद्-य॑ज॒मानाः॑ श॒र्म
न॒ह्यन्ते॑ऽना॒र्त्ये॑ बृ॒हद्-रथ॑न्तराभ्यां॑ य॒न्तीयं॑ वा॒व रथ॑न्तरम॒सौ
बृ॒हदा॑भ्यामे॒व य॒न्त्यथो॑ अ॒नयो॑रे॒व प्रति॑ तिष्ठ॑न्त्ये॒ते वै
य॒ज्ञस्या॑ज्ज॒साय॑नी स्रु॒ती ता॑भ्यामे॒व – [] 7

TS 7.4.2.4 - Padam

छन्दो॑मा इति॑ छन्दः॑ – माः॑ । ओज॑सि । ए॒व । वी॒र्ये॑ । प॒शुषु॑ ।
प्रती॑ति । ति॒ष्ठन्ति॑ । त्रयः॑ । त्रय॑स्त्रि॒ंशा इति॑ त्रयः॑ – त्रि॒ंशाः॑ ।
अ॒वस्ता॑त् । भ॒वन्ति॑ । त्रयः॑ । त्रय॑स्त्रि॒ंशा इति॑ त्रयः॑ – त्रि॒ंशाः॑ ।
प॒रस्ता॑त् । म॒द्ध्ये॑ । पृ॒ष्ठानि॑ । उ॒रः । वै । त्रय॑स्त्रि॒ंशा इति॑
त्रयः॑ – त्रि॒ंशाः॑ । आ॒त्मा । पृ॒ष्ठानि॑ । आ॒त्मने॑ । ए॒व । तत् ।
यज॑मानाः । श॒र्म । न॒ह्यन्ते॑ । अ॒ना॒र्त्ये॑ । बृ॒हद्र॑थ॒न्तरा॑भ्यामिति॑
बृ॒हत् – र॒थ॒न्तरा॑भ्याम् । य॒न्ती । इ॒यम् । वा॒व । र॒थ॒न्तर॑मिति॑
रथं॑ – त॒रम् । अ॒सौ । बृ॒हत् । आ॒भ्याम् । ए॒व । य॒न्ति । अथो॑ इति॑ ।
अ॒नयोः॑ । ए॒व । प्रती॑ति । ति॒ष्ठन्ति॑ । ए॒ते इति॑ । वै । य॒ज्ञस्य॑ ।
अ॒ञ्ज॒साय॑नी इत्य॑ञ्जसा – अ॒यनी॑ । स्रु॒ती इति॑ । ता॒भ्याम् ।

ए॒व । 7 (50)

TS 7.4.2.5

सु॒वर्गं॑ लो॒कं य॑न्ति प॒राञ्चो॑ वा ए॒ते सु॒वर्गं॑ लो॒कम॑भ्यारोहन्ति॑
ये प॒रा॒ची॒नानि॑ पृ॒ष्ठान्यु॑पयन्ति॑ प्र॒त्यङ् ष॒डहो॑ भ॒वति॑ प्र॒त्यव॑रूढ्या॒ अथो॑

प्रतिष्ठित्या उभयो॑र्लो॒कयो॑र् ऋ॒द्ध्वोत् तिष्ठ॑न्ति त्रिवृ॑तोऽधि त्रिवृ॑तमुप॑
यन्ति स्तो॒माना॑ꣳ संप॑त्त्यै प्र॒भवाय॑ ज्योति॑रग्नि॒ष्टोमो भव॑त्ययं वा॒व स
क्षयो॑ऽस्मादे॒व तेन॑ क्षया॒न्न यन्ति॑ चतुर्विं॑शतिरा॒त्रो भव॑ति
चतुर्विं॑शति॒र्द्धमा॒साः सँव॑त्सरः () सँव॑त्सरः सु॒वर्गो लो॒कः
सँव॑त्सर ए॒व सु॒वर्गे लो॒के प्रति॑ तिष्ठन्त्यथो चतुर्विं॑शत्यक्षरा गाय॒त्री
गाय॒त्री ब्र॒ह्मव॑र्चसं गाय॒त्रियै॑व ब्र॒ह्मव॑र्चसम॒व रु॑न्धते ऽतिरा॒त्राव॑भितो
भव॑तो ब्र॒ह्मव॑र्चसस्य परिगृही॒त्यै ॥ 8

TS 7.4.2.5 - Padam

सु॒वर्गमि॑ति सु॒वः – गम् । लो॒कम् । यन्ति॑ । परा॑ञ्चः । वै । ए॒ते ।
सु॒वर्गमि॑ति सु॒वः-गम् । लो॒कम् । अ॒भ्यारो॑हन्तीत्यभि – आ॒रोह॑न्ति ।
ये । परा॑ची॒नानि॑ । पृ॒ष्ठानि॑ । उ॒पय॑न्तीत्युप – यन्ति॑ । प्र॒त्यङ् । ष॒डह॑
इति॑ षट् – अ॒हः । भव॑ति । प्र॒त्यवरू॑ढ्या इति॑ प्रति – अ॒वरू॑ढ्यै ।
अथो॑ इति॑ । प्रतिष्ठित्या॑ इति॑ प्रति – स्थि॒त्यै । उ॒भयोः॑ । लो॒कयोः॑ ।
ऋ॒द्ध्वा । उ॒दिति॑ । तिष्ठ॑न्ति । त्रिवृ॑त इति॑ त्रि – वृ॒तः । अधी॑ति ।

त्रिवृ॑तमि॒ति त्रि॑ – वृ॒तम् । उपे॑ति । य॒न्ति । स्तो॑मा॒नाम् ।
संप॑त्त्या इति सं – प॒त्त्यै । प्र॒भवा॑येति प्र – भ॒वाय॑ । ज्यो॑तिः ।
अ॒ग्नि॒ष्टोम॑ इत्य॒ग्नि-स्तो॑मः । भव॑ति । अ॒यम् । वाव॑ । सः । क्षयः॑ ।
अ॒स्मात् । ए॒व । तेन॑ । क्षया॑त् । न । य॒न्ति । चतु॑र्वि॒ंशति॑रात्र इति
चतु॑र्वि॒ंशति॑-रात्रः । भव॑ति । चतु॑र्वि॒ंशति॑रिति चतुः-वि॒ंशतिः॑ ।
अ॒र्धमा॑सा इत्य॒र्ध – मा॑साः । सँव॑त्सर इति सं – व॒त्सरः॑ () ।
सँव॑त्सर इति सं – व॒त्सरः॑ । सु॒वर्ग॑ इति सुवः – गः । लो॒कः ।
सँव॑त्सर इति सं-व॒त्सरे॑ । ए॒व । सु॒वर्ग॑ इति सुवः – गे । लो॒के ।
प्रती॑ति । तिष्ठ॑न्ति । अथो॑ इति ।
चतु॑र्वि॒ंशत्य॑क्षरेति चतु॑र्वि॒ंशति॑- अ॒क्षरा॑ । गा॒यत्री॑ । गा॒यत्री॑ ।
ब्र॒ह्मव॑र्चसमिति ब्र॒ह्म – व॑र्चसम् । गा॒यत्रि॑या । ए॒व । ब्र॒ह्मव॑र्चसमिति
ब्र॒ह्म – व॑र्चसम् । अवे॑ति । रु॒न्धते॑ । अ॒तिरा॑त्रावित्यति – रा॒त्रौ ।
अ॒भितः॑ । भव॑तः । ब्र॒ह्मव॑र्चस्येति ब्र॒ह्म – व॑र्चसस्य ।
परि॑गृहीत्या इति परि – गृ॒हीत्यै॑ ॥ 8 (74)

(मनुष्यस्य – मध्यतः – पशव – स्ताभ्यामेव – सँवत्सर –
श्चतुर्विंशतिश्च) (A2)

TS 7.4.3.1

ऋक्षा वा इयमलोमकाऽऽसीत् साऽकामयतौषधीभिर्वनस्पतिभिः
प्र जायेयेति सैतास्त्रिंशत् रात्रीरपश्यत् ततो वा इयमोषधीभि-
र्वनस्पतिभिः प्राजायत ये प्रजाकामाः पशुकामाः स्युस्त एता
आसीरन् प्रैव जायन्ते प्रजया पशुभिरियं वा अक्षुद्ध्यत् सैतां
विराजमपश्यत् तामात्मन् धित्वाऽन्नाद्यमवा रुन्धौषधी – [] 9

TS 7.4.3.1 - Padam

ऋक्षा । वा । इयम् । अलोमका । आसीत् । सा । अकामयत ।
ओषधीभिरित्योषधि-भिः । वनस्पतिभिरिति वनस्पति-भिः । प्रेति ।
जायेय । इति । सा । एताः । त्रिंशत् । रात्रीः । अपश्यत् । ततः ।
वै । इयम् । ओषधीभिरित्योषधि – भिः । वनस्पतिभिरिति
वनस्पति – भिः । प्रेति । अजायत । ये । प्रजाकामा
इति प्रजा – कामाः । पशुकामा इति पशु – कामाः । स्युः । ते ।

ए॒ताः । आ॒सी॒रन् । प्रे॒ति । ए॒व । जा॒य॒न्ते । प्र॒जये॒ति प्र-जया॑ ।
प॒शुभि॒रिति॑ प॒शु-भिः । इ॒यम् । वै । अ॒क्षु॒द्ध्यत् । सा । ए॒ताम् ।
वि॒राज॒मिति॑ वि - राज॑म् । अ॒पश्य॑त् । ताम् । आ॒त्मन् । धि॒त्वा ।
अ॒न्नाद्य॑मित्य॒न्न - अद्य॑म् । अ॒वेति॑ । अ॒रुन्ध॑ । ओष॑धीः । 9 (50)

TS 7.4.3.2

-र्व॒नस्प॑तीन् प्र॒जां प॒शून् ते॒नाव॑र्द्धत सा जे॒मानं॑ म॒हिमा॑न-म॒गच्छ॑द्य
ए॒वं वि॒द्वाँस॑ ए॒ता आ॑सते वि॒राज॑मे॒वाऽऽत्म॑न् धि॒त्वाऽन्नाद्य॑म॒व
रु॒न्धते॑ व॒र्द्धन्ते॑ प्र॒जया॑ प॒शुभिर्जे॒मानं॑ म॒हिमा॑नं ग॒च्छन्ति॑
ज्योति॑रति॒रात्रो॑ भ॒वति॑ सु॒वर्ग॑स्य लो॒कस्या॑नु॒ख्यात्यै॑ पृ॒ष्ठ्यः षड॑हो
भ॒वति॑ षड् वा ऋ॒तवः॑ षट् पृ॒ष्ठानि॑ पृ॒ष्ठैरे॒वतू॑न्वा-रो॒हन्त्य॑तु॒भिः
सँव॑त्सरं ते सँव॑त्सर ए॒व - [] 10

TS 7.4.3.2 - Padam

व॒नस्प॑तीन् । प्र॒जामि॑ति प्र - जा॒म् । प॒शून् । ते॒न । अ॒व॒र्द्धत॑ । सा ।
जे॒मान॑म् । म॒हिमा॑नम् । अ॒ग॒च्छत् । ये । ए॒वम् । वि॒द्वाँसः॑ ।
ए॒ताः । आ॑सते । वि॒राज॑मिति वि-राज॑म् । ए॒व । आ॒त्मन् । धि॒त्वा ।

अ॒न्नाद्य॒मित्य॑न्न – अ॒द्यम् । अ॒वेति॑ । रु॒न्ध॒ते । व॒र्द्ध॑न्ते । प्र॒जये॑ति
प्र – जया॑ । प॒शुभि॑रिति प॒शु – भिः । जे॒मानम् । म॒हि॒मानम् ।
ग॒च्छ॒न्ति । ज्योतिः॑ । अ॒ति॒रात्र॑ इत्य॒ति – रा॒त्रः । भ॒व॒ति । सु॒व॒र्ग॒स्येति॑
सु॒वः – ग॒स्य । लो॒क॒स्य । अ॒नु॒ख्या॒त्या इत्य॑नु – ख्या॒त्यै । पृ॒ष्ठ्यः ।
ष॒ड॒ह इति॑ षट् – अ॒हः । भ॒व॒ति । षट् । वै । ऋ॒त॒वः । षट् ।
पृ॒ष्ठानि॑ । पृ॒ष्ठैः । ए॒व । ऋ॒तून् । अ॒न्वा॒रो॒ह॒न्तीत्य॑नु – आ॒रो॒ह॒न्ति ।
ऋ॒तुभि॑रित्यृ॒तु – भिः । सँ॒व॒त्स॒रमि॑ति सं – व॒त्स॒रम् । ते ।
सँ॒व॒त्स॒र इति॑ सं – व॒त्स॒रे । ए॒व । 10 (50)

TS 7.4.3.3

प्र॒ति ति॑ष्ठन्ति त्रयस्त्रि॒ंश॒त् त्रयस्त्रि॒ंश॒मुप॑ यन्ति य॒ज्ञस्य॑ सं॒त॒त्या
अथो॑ प्र॒जाप॑तिर्वै त्रयस्त्रि॒ंशः प्र॒जाप॑तिमे॒वाऽऽ*र॑भन्ते प्र॒तिष्ठि॑त्यै
त्रि॒ण॒वो भ॑वति वि॒जि॒त्या ए॒क॒वि॒ंशो भ॑वति प्र॒तिष्ठि॑त्या अथो
रु॒च॒मे॒वाऽऽ*त्म॑न् द॒ध॒ते त्रि॒वृ॒द॒ग्नि॒ष्टुद्-भ॑वति पा॒प्मान॑मे॒व तेन॑
नि॒र्द॒ह॒न्तेऽथो॑ ते॒जो वै त्रि॒वृ॒त् तेज॑ ए॒वाऽऽत्म॑न् द॒ध॒ते पञ्च॑द॒श
इ॒न्द्र॒स्तो॒मो भ॑वतीन्द्रि॒यमे॒वाव॑ – [] 11

TS 7.4.3.3 - Padam

प्र॒तीति॑ । ति॒ष्ठन्ति॑ । त्रय॑स्त्रि॒ंश॑ादि॒ति त्रयः॑ – त्रि॒ंश॑ात् ।
त्रय॑स्त्रि॒ंश॑मि॒ति त्रयः॑ – त्रि॒ंश॑म् । उपे॒ति॑ । य॒न्ति॑ । य॒ज्ञस्य॑ ।
सं॒त॒त्या इति॑ सं – त॒त्यै॑ । अथो॒ इति॑ । प्र॒जाप॑ति॒रिति॑ प्र॒जा-प॑तिः ।
वै । त्रय॑स्त्रि॒ंश॑ इति॑ त्रयः-त्रि॒ंशः॑ । प्र॒जाप॑ति॒मिति॑ प्र॒जा-प॑तिम् ।
ए॒व । ए॒ति॑ । र॒भन्ते॑ । प्र॒तिष्ठि॑त्या इति॑ प्र॒ति – स्थि॒त्यै॑ । त्रि॒णव॑ इति॑
त्रि – न॒वः॑ । भ॒वति॑ । वि॒जि॑त्या इति॑ वि – जि॒त्यै॑ । ए॒कवि॑ंश
इत्ये॒क – वि॒ंशः॑ । भ॒वति॑ । प्र॒तिष्ठि॑त्या इति॑ प्र॒ति – स्थि॒त्यै॑ ।
अथो॒ इति॑ । रुच॑म् । ए॒व । आ॒त्मन् । द॒धते॑ । त्रि॒वृदि॑ति त्रि – वृ॒त् ।
अ॒ग्नि॒ष्टुदि॑त्य॒ग्नि – स्तु॒त् । भ॒वति॑ । पा॒प्मान॑म् । ए॒व । तेन॑ । नि॒रिति॑ ।
द॒हन्ते॑ । अथो॒ इति॑ । तेजः॑ । वै । त्रि॒वृदि॑ति त्रि-वृ॒त् । तेजः॑ । ए॒व ।
आ॒त्मन् । द॒धते॑ । प॒ञ्चद॑श इति॑ प॒ञ्च – द॑शः । इ॒न्द्र॒स्तोम॑
इती॒न्द्र – स्तो॒मः॑ । भ॒वति॑ । इ॒न्द्रि॒यम् । ए॒व । अ॒वेति॑ । 11 (50)

TS 7.4.3.4

रुन्धते सप्तदशो भवत्यन्नाद्यस्या वरुद्ध्या अथो प्रैव तेन जायन्त
एकविंशो भवति प्रतिष्ठित्या अथो रुचमेवाऽऽत्मन् दधते
चतुर्विंशो भवति चतुर्विंशतिरर्द्धमासाः सँवत्सरः सँवत्सरः
सुवर्गो लोकः सँवत्सर एव सुवर्गे लोके प्रति तिष्ठन्त्यथो एष वै
विषूवान् विषूवन्तो भवन्ति य एवं विद्वाँस एता आसते
चतुर्विंशात् पृष्ठान्युप यन्ति सँवत्सर एव प्रतिष्ठाय – [] 12

TS 7.4.3.4 - Padam

रुन्धते । सप्तदश इति सप्त – दशः । भवति ।
अन्नाद्यस्येत्यन्न – अद्यस्य । अवरुद्ध्या इत्यव – रुद्ध्यै । अथो इति ।
प्रेति । एव । तेन । जायन्ते । एकविंश इत्येक – विंशः ।
भवति । प्रतिष्ठित्या इति प्रति – स्थित्यै । अथो इति । रुचम् । एव ।
आत्मन् । दधते । चतुर्विंश इति चतुः – विंशः । भवति ।
चतुर्विंशतिरिति चतुः – विंशतिः ।
अर्द्धमासा इत्यर्द्ध – मासाः । सँवत्सर इति सं – वत्सरः ।

सँव॒थ्स॒र इति॑ सं – व॒थ्स॒रः । सु॒वर्ग॑ इति॑ सुवः – गः । लो॒कः ।
सँव॒थ्स॒र इति॑ सं – व॒थ्स॒रे । ए॒व । सु॒वर्ग॑ इति॑ सुवः – गे ।
लो॒के । प्र॒तीति॑ । ति॒ष्ठन्ति॑ । अथो॒ इति॑ । ए॒षः । वै । वि॒षू॒वानिति॑
वि॒षु – वान् । वि॒षू॒वन्त॑ इति॑ वि॒षु – वन्तः॑ । भ॒वन्ति॑ । ये । ए॒वम् ।
वि॒द्वा॒ऽसः॑ । ए॒ताः । आ॒स॒ते । च॒तुर्वि॒॒॒शा॒दिति॑ चतुः – वि॒॒॒शात् ।
पृ॒ष्ठानि॑ । उ॒पेति॑ । य॒न्ति । सँव॒थ्स॒र इति॑ सं – व॒थ्स॒रे । ए॒व ।
प्र॒ति॒ष्ठा॒येति॑ प्र॒ति–स्था॒य । 12 (50)

TS 7.4.3.5

दे॒वता॑ अ॒भ्या॒रो॒हन्ति॑ त्रय॒स्त्रि॒॒॒शात् त्रय॒स्त्रि॒॒॒शमु॒प॑ य॒न्ति
त्रय॒स्त्रि॒॒॒शद्वै॑ दे॒वता॑ दे॒वता॑स्वे॒व प्र॒ति ति॒ष्ठन्ति॑ त्रि॒णवो॑ भ॒वती॒मे वै
लो॒कास्त्रि॒णव॑ ए॒ष्वे॒व लो॒केषु॑ प्र॒ति ति॒ष्ठन्ति॑ द्वा॒वे॒कवि॒॒॒शौ भ॒वतः॑
प्र॒ति॒ष्ठि॒त्या अथो॒ रुच॑मे॒वाऽऽ॒त्मन् द॑ध॒ते ब॒हवः॑ षोड॒शि॒नो भ॒वन्ति॑
तस्मा॑द्–ब॒हवः॑ प्र॒जासु॑ वृ॒षा॒णो य॒दे॒ते स्तो॒मा व्य॑ति॒षक्ता॑ भ॒वन्ति॑
तस्मा॑दि॒य –मो॑ष॒धीभि॑–र्व॒नस्प॑ति॒भि–व्य॑ति॒षक्ता॑ – [] 13

TS 7.4.3.5 - Padam

दे॒वताः॑ । अ॒भ्या॒रो॒हन्ती॑त्य॒भि – आ॒रो॒हन्ति॑ । त्र॒यस्त्रि॑ञ्श॒दिति॑
त्रयः – त्रि॑ञ्शात् । त्र॒यस्त्रि॑ञ्श॒मिति॑ त्रय – त्रि॑ञ्शम् । उपेति॑ ।
यन्ति॑ । त्र॒यस्त्रि॑ञ्श॒दिति॑ त्रयः – त्रि॑ञ्शात् । वै । दे॒वताः॑ । दे॒वता॑सु ।
ए॒व । प्र॒तीति॑ । ति॒ष्ठन्ति॑ । त्रि॒णव॑ इति॑ त्रि – न॒वः । भ॒वति॑ । इ॒मे ।
वै । लो॒काः । त्रि॒णव॑ इति॑ त्रि – न॒वः । ए॒षु । ए॒व । लो॒केषु॑ ।
प्र॒तीति॑ । ति॒ष्ठन्ति॑ । द्वौ । ए॒कवि॑ञ्श॒वित्ये॑क – वि॒ञ्शौ । भ॒वतः॑ ।
प्रति॑ष्ठित्या इति॑ प्र॒ति – स्थि॒त्यै । अथो॑ इति॑ । रु॒चम् । ए॒व ।
आ॒त्मन् । द॒धते॑ । ब॒हवः॑ । षो॒ड॒शिनः॑ । भ॒वन्ति॑ । तस्मा॑त् । ब॒हवः॑ ।
प्र॒जास्वि॑ति प्र – जा॒सु । वृ॒षाणः॑ । यत् । ए॒ते । स्तो॒माः ।
व्य॒तिष॑क्ता इति॑ वि – अ॒तिष॑क्ताः । भ॒वन्ति॑ । तस्मा॑त् । इ॒यम् ।
ओ॒षधी॑भिरि॒त्योष॑धि – भिः । व॒नस्प॑तिभिरिति॑ व॒नस्प॑ति – भिः ।
व्य॒तिष॑क्तेति॑ वि – अ॒तिष॑क्ता । 13 (50)

TS 7.4.3.6

व्यतिष॑ज्यन्ते प्र॒जया॑ प॒शुभि॑र्य॒ एवं वि॒द्वाꣳस॑ ए॒ता आ॒स॒ते ऽक्लृ॑प्ता
वा ए॒ते सु॒वर्गं॑ लो॒कं य॑न्त्युच्चाव॒चान् हि स्तोमा॑नुपयन्ति यदेत
ऊर्ध्वाः॑ क्लृ॒प्ताः स्तोमा॑ भवन्ति क्लृ॒प्ता ए॒व सु॒वर्गं॑ लो॒कं
य॑न्त्यु॒भयो॑रे॒भ्यो लो॒कयोः॑ कल्पते त्रि॒ꣳशदे॑तास्त्रि॒ꣳशद॑क्षरा वि॒राडन्नं॑
वि॒राड् वि॒राजै॒वान्नाद्य॑मव रुन्धते ऽति॒रात्रा॑व॒भितो॑ भवतो ऽन्नाद्य॑स्य
परि॑गृहीत्यै ॥ 14

TS 7.4.3.6 - Padam

व्यतिष॑ज्यन्त इति॑ वि – अतिष॑ज्यन्ते । प्र॒जयेति॑ प्र – जया॑ ।
प॒शुभि॑रिति॑ प॒शु – भिः । ये । ए॒वम् । वि॒द्वाꣳसः॑ । ए॒ताः । आ॒स॒ते ।
अक्लृ॑प्ताः । वै । ए॒ते । सु॒वर्गमि॑ति सुवः – गम् । लो॒कम् । य॒न्ति ।
उच्चा॑व॒चान् । हि । स्तोमा॑न् । उ॒पय॑न्तीत्युप – यन्ति॑ । यत् । ए॒ते ।
ऊर्ध्वाः॑ । क्लृ॒प्ताः । स्तोमाः॑ । भव॑न्ति । क्लृ॒प्ताः । ए॒व ।
सु॒वर्गमि॑ति सुवः – गम् । लो॒कम् । य॒न्ति । उ॒भयोः॑ । ए॒भ्यः ।
लो॒कयोः॑ । कल्प॑ते । त्रि॒ꣳशत् । ए॒ताः ।

त्रि॒ंश॑द॒क्षरे॑ति त्रि॒ंश॑त् – अ॒क्ष॒रा । वि॒राडि॑ति वि – राट् । अ॒न्नम् ।
वि॒राडि॑ति वि – राट् । वि॒राजे॑ति वि – रा॒जा । ए॒व ।
अ॒न्नाद्य॑मित्य॒न्न-अ॒द्यम् । अ॒वेति॑ । रु॒न्ध॒ते । अ॒तिरा॑न्नावि॒त्यति॑ – रा॒त्रौ ।
अ॒भितः॑ । भ॒वतः॑ । अ॒न्नाद्य॑स्येत्य॒न्न – अ॒द्यस्य॑ ।
परि॑गृही॒त्या इति॑ परि – गृ॒हीत्यै॑ ॥ 14 (49)

(ओष॑धीः – सँव॑त्सर॒ ए॒वा – ऽव॑ – प्र॒तिष्ठा॑य – व्य॒तिष॑क्त्यै –
का॒न्नप॑ञ्चा॒शच्च॑) (A3)

TS 7.4.4.1

प्र॒जाप॑तिः सु॒वर्गं॑ लो॒कमै॑त् तं दे॒वा येन॑येन॒ छन्द॑साऽनु प्रायु॑ज्जत
तेन॒ नाऽऽ*प्नु॑वन् त ए॒ता द्वात्रि॑ंश॒तं रा॒त्रीर॑पश्यन् द्वात्रि॑ंश॒दक्ष॑रा
ऽनु॑ष्टु॒गा-नु॑ष्टु॒भः प्र॒जाप॑तिः स्वेनै॒व छन्द॑सा प्र॒जाप॑ति-मा॒प्त्वा
ऽभ्या॑रुह्य सु॒वर्गं॑ लो॒कमा॑यन्. य ए॒वं वि॒द्वाँस॑ ए॒ता आ॑सते
द्वात्रि॑ंश॒दे॒ता द्वात्रि॑ंश॒दक्ष॑रा ऽनु॑ष्टु॒गा-नु॑ष्टु॒भः प्र॒जाप॑तिः स्वेनै॒व
छन्द॑सा प्र॒जाप॑तिमा॒प्त्वा श्रि॑यं गच्छन्ति – [] 15

TS 7.4.4.1 - Padam

प्र॒जाप॑तिरि॒ति प्र॒जा – प॒तिः । सु॒वर्ग॑मि॒ति सु॒वः – ग॒म् । लो॒कम् ।
ऐ॒त् । त॒म् । दे॒वाः । येन॑ये॒नेति॑ येन॑ – येन॑ । छ॒न्दसा॑ । अ॒नु । प्रेति॑ ।
अ॒युञ्ज॑त । तेन॑ । न । आ॒प्नु॒वन् । ते । ए॒ताः । द्वा॒त्रिं॑श॒तम् ।
रा॒त्रीः । अ॒पश्य॑न् । द्वा॒त्रिं॑श॒दक्ष॑रेति॑ द्वा॒त्रिं॑श॒त् – अ॒क्षरा॑ ।
अ॒नुष्टु॑गि॒त्यनु॑ – स्तुक् । आ॒नुष्टु॑भ॒ इत्या॑नु – स्तु॒भः । प्र॒जाप॑तिरि॒ति
प्र॒जा-प॑तिः । स्वेन॑ । ए॒व । छ॒न्दसा॑ । प्र॒जाप॑तिमि॒ति प्र॒जा-प॑तिम् ।
आ॒प्त्वा । अ॒भ्या॒रुह्ये॑त्य॒भि – आ॒रुह्य॑ । सु॒वर्ग॑मि॒ति सु॒वः – ग॒म् ।
लो॒कम् । आ॒यन् । ये । ए॒वम् । वि॒द्वाँ॑सः । ए॒ताः । आ॒स॒ते ।
द्वा॒त्रिं॑श॒त् । ए॒ताः । द्वा॒त्रिं॑श॒दक्ष॑रेति॑ द्वा॒त्रिं॑श॒त् – अ॒क्षरा॑ ।
अ॒नुष्टु॑गि॒त्यनु॑ – स्तुक् । आ॒नुष्टु॑भ॒ इत्या॑नु – स्तु॒भः । प्र॒जाप॑तिरि॒ति
प्र॒जा-प॑तिः । स्वेन॑ । ए॒व । छ॒न्दसा॑ । प्र॒जाप॑तिमि॒ति प्र॒जा-प॑तिम् ।
आ॒प्त्वा । श्रि॒यम् । ग॒च्छ॒न्ति । 15 (50)

TS 7.4.4.2

श्रीर्.हि म॒नु॒ष्य॑स्य सु॒वर्गो॑ लो॒को द्वा॒त्रिं॑श॒दे॒ता द्वा॒त्रिं॑श॒दक्ष॑रा-
ऽनु॒ष्टु॒ग्-वा॒गनु॒ष्टु॒प् सर्वा॑मे॒व वा॒चमा॑प्नुवन्ति॒ सर्वे॑ वा॒चो व॑दि॒तारो॑
भव॑न्ति॒ सर्वे॑ हि श्रि॒यं ग॑च्छन्ति॒ ज्योति॑र्गौरा॒युरि॑ति॒ त्र्य॒हा भ॑वन्ती॒यं
ँवा॒व ज्योति॑रन्त॒रि॒क्षं गौ॒रसा॑वा॒युरि॑माने॒व लो॒कान॑भ्या॒रोह॑न्त्यभि॒पूर्वं
त्र्य॒हा भ॑वन्त्यभि॒पूर्वमे॒व सु॒वर्गं॑ ँलो॒कम॑भ्या॒रोह॑न्ति॒ बृहद्-र॑थन्त॒राभ्यां॑
ँयन्ती॒ - [] 16

TS 7.4.4.2 - Padam

श्रीः । हि । म॒नु॒ष्य॑स्य । सु॒वर्ग॑ इति सु॒वः-गः । लो॒कः ।
द्वा॒त्रिं॑शत् । ए॒ताः । द्वा॒त्रिं॑श॒दक्ष॑रेति॒ द्वा॒त्रिं॑शत् - अ॒क्षरा॑ ।
अ॒नु॒ष्टु॒गित्य॑नु - स्तुक् । वाक् । अ॒नु॒ष्टु॒बित्य॑नु - स्तुप् । सर्वा॑म् ।
ए॒व । वा॒चम् । आ॒प्नु॒वन्ति॑ । सर्वे॑ । वा॒चः । व॑दि॒तारः॑ । भ॑वन्ति ।
सर्वे॑ । हि । श्रि॒यम् । ग॑च्छन्ति । ज्योतिः । गौः । आ॒युः । इति॑ ।
त्र्य॒हा इति॑ त्रि - अ॒हाः । भ॑वन्ति । इ॒यम् । वा॒व । ज्योतिः॑ ।
अ॒न्त॒रि॒क्षम् । गौः । अ॒सौ । आ॒युः । इ॒मान् । ए॒व । लो॒कान् ।

अ॒भ्यारो॑ह॒न्तीत्य॑भि – आरो॑हन्ति । अ॒भि॒पूर्व॑मित्य॑भि – पूर्व॑म् ।
त्र्य॒हा इति॑ त्रि-अ॒हाः । भ॒वन्ति॑ । अ॒भि॒पूर्व॑मित्य॑भि – पूर्व॑म् । ए॒व ।
सु॒वर्ग॑मिति॑ सु॒वः – ग॒म् । लो॒कम् । अ॒भ्यारो॑ह॒न्तीत्य॑भि-आरो॑हन्ति ।
बृ॒ह॒द्र॒थ॒न्तरा॑भ्यामिति॑ बृ॒ह॒त् – र॒थ॒न्तरा॑भ्याम् । य॒न्ति॑ । 16 (50)

TS 7.4.4.3

-यं वा॑व र॒थ॒न्तर॑मसौ बृ॒ह॒दा॒भ्यामे॒व य॒न्त्यथो॑ अ॒नयो॑रे॒व प्र॑ति
तिष्ठ॑न्त्ये॒ते वै य॒ज्ञस्या॑ञ्ज॒साय॑नी स्रु॒ती ता॑भ्यामे॒व सु॒वर्गं॑ लो॒कं य॑न्ति
परा॑ञ्चो वा ए॒ते सु॒वर्गं॑ लो॒कम॑भ्यारो॑हन्ति॒ ये परा॑च॒स्त्र्यहा॑नु॒पय॑न्ति
प्र॒त्यङ् त्र्य॑हो भ॒वति॑ प्र॒त्यव॑रूढ्या॒ अथो॑ प्र॒तिष्ठि॑त्या उ॒भयो॑र्लो॒कयो॑र्.
ऋ॒द्ध्वोत् तिष्ठ॑न्ति द्वा॒त्रिं॑श॒दे॒तास्ता॑सां या॒ स्त्रिं॑शत्
त्रिं॑श॒दक्ष॑रा () वि॒राड॑न्नं वि॒राड् वि॒राजै॑वाऽन्नाद्य॒मव॑ रुन्ध॒ते ये
द्वे अ॑हो॒रात्रे॑ ए॒व ते उ॒भाभ्या॑ रू॒पाभ्या॑ सु॒वर्गं॑ लो॒कं
य॑न्त्यति॒रात्रा॑व॒भितो॑ भ॒वतः॑ परि॒गृही॑त्यै ॥ 17

TS 7.4.4.3 - Padam

इ॒यम् । वा॒व । र॒थ॒न्त॒र॒मि॒ति॑ र॒थं – त॒रम् । अ॒सौ । बृ॒हत् । आ॒भ्याम् ।
ए॒व । य॒न्ति॑ । अ॒थो इ॒ति॑ । अ॒न॒योः॑ । ए॒व । प्र॒ती॒ति॑ । ति॒ष्ठ॒न्ति॑ ।
ए॒ते इ॒ति॑ । वै । य॒ज्ञ॒स्य॑ । अ॒ञ्ज॒सा॒य॒नी॑ इ॒त्य॒ञ्ज॒सा – अ॒य॒नी ।
स्रु॒ती इ॒ति॑ । ता॒भ्याम् । ए॒व । सु॒व॒र्ग॒मि॒ति॑ सु॒वः – ग॒म् । लो॒कम् ।
य॒न्ति॑ । प॒राञ्चः॑ । वै । ए॒ते । सु॒व॒र्ग॒मि॒ति॑ सु॒वः – ग॒म् । लो॒कम् ।
अ॒भ्या॒रो॒ह॒न्ती॒त्य॒भि – आ॒रो॒ह॒न्ति॑ । ये । प॒रा॒चः । त्र्य॒हा॒नि॒ति॑
त्रि – अ॒हान् । उ॒प॒य॒न्ती॒त्यु॒प – य॒न्ति॑ । प्र॒त्य॒ङ् । त्र्य॒हा इ॒ति॑
त्रि – अ॒हः । भ॒व॒ति॑ । प्र॒त्य॒व॒रू॒ढ्या इ॒ति॑ प्र॒ति – अ॒व॒रू॒ढ्यै ।
अ॒थो इ॒ति॑ । प्र॒ति॒ष्ठि॒त्या इ॒ति॑ प्र॒ति – स्ति॒थ्यै॑ । उ॒भ॒योः॑ । लो॒क॒योः॑ ।
ऋ॒द्॒ध्वा । उ॒दि॒ति॑ । ति॒ष्ठ॒न्ति॑ । द्वा॒त्रिं॒शत् । ए॒ताः । ता॒सा॒म् । याः ।
त्रिं॒शत् । त्रिं॒श॒द॒क्ष॒रे॒ति॑ त्रिं॒शत् – अ॒क्ष॒रा () । वि॒रा॒डि॒ति॑
वि – रा॒ट् । अ॒न्नम् । वि॒रा॒डि॒ति॑ वि – रा॒ट् । वि॒रा॒जे॒ति॑ वि – रा॒जा॑ ।
ए॒व । अ॒न्ना॒द्य॒मि॒त्य॒न्न – अ॒द्यम् । अ॒वे॒ति॑ । रु॒न्ध॒ते । ये इ॒ति॑ ।
द्वे इ॒ति॑ । अ॒हो॒रा॒त्रे इ॒त्य॒हः – रा॒त्रे । ए॒व । ते इ॒ति॑ । उ॒भा॒भ्याम् ।

रूपाभ्याम् । सुवर्गमिति सुवः – गम् । लोकम् । यन्ति ।

अतिरात्रावित्यति – रात्रौ । अभितः । भवतः ।

परिगृहीत्या इति परि – गृहीत्यै ॥ 17 (72)

(गच्छन्ति – यन्ति – त्रिंशदक्षरा – द्वाविंशतिश्च) (A4)

TS 7.4.5.1

द्वे वाव देवसत्रे द्वादशाहश्चैव त्रयस्त्रिंशदहश्च य एवं

विद्वांसस्त्रयस्त्रिंशदहमासते साक्षादेव देवता अभ्यारोहन्ति

यथा खलु वै श्रेयानभ्यारूढः कामयते तथा करोति यद्यवविद्ध्यति

पापीयान् भवति यदि नावविद्ध्यति सदृङ् य एवं

विद्वांसस्त्रयस्त्रिंशदहमासते वि पाप्मना भ्रातृव्येणाऽऽ* वर्तन्ते

ऽहर्भाजो वा एता देवा अग्र आऽहर – [] 18

TS 7.4.5.1 - Padam

द्वे इति । वाव । देवसत्रे इति देव – सत्रे । द्वादशाह इति

द्वादश-अहः । च । एव । त्रयस्त्रिंशदह इति त्रयस्त्रिंशत्-अहः ।

च । ये । ए॒वम् । वि॒द्वा॒ऽसः । त्र॒यस्त्रि॒ंश॒द॒ह॒मि॒ति
त्र॒यस्त्रि॒ंश॒त्-अ॒हम् । आ॒स॒ते । सा॒क्षा॒दि॒ति॒ स - आ॒क्षा॒त् । ए॒व ।
दे॒वताः॑ । अ॒भ्या॒रो॒ह॒न्ती॒त्य॒भि - आ॒रो॒ह॒न्ति॒ । यथा॑ । ख॒लु॑ । वै ।
श्रे॒या॒न् । अ॒भ्या॒रू॒ढ इ॒त्य॒भि - आ॒रू॒ढः । का॒म॒य॒ते । तथा॑ । क॒रो॒ति॒ ।
यदि॑ । अ॒व॒वि॒द्ध्य॒ती॒त्य॒व - वि॒द्ध्य॒ति॒ । पा॒पी॒या॒न् । भ॒व॒ति॒ । यदि॑ ।
न । अ॒व॒वि॒द्ध्य॒ती॒त्य॒व - वि॒द्ध्य॒ति॒ । स॒दृ॒ङ्ङि॒ति॒ स - दृ॒ङ् । ये ।
ए॒वम् । वि॒द्वा॒ऽसः । त्र॒यस्त्रि॒ंश॒द॒ह॒मि॒ति त्र॒यस्त्रि॒ंश॒त् - अ॒हम् ।
आ॒स॒ते । वी॒ति॒ । पा॒प्म॒ना॑ । भ्रा॒तृ॒व्ये॒ण । ए॒ति॒ । वर्त॑न्ते ।
अ॒ह॒र्भा॒ज इ॒त्य॒हः - भा॒जः । वै । ए॒ताः । दे॒वाः । अ॒ग्रे॑ । ए॒ति॒ ।

अ॒ह॒र॒न् । 18 (50)

TS 7.4.5.2

-न॒ह॒रे॒को ऽभ॒ज॒ता-ह॒रे॒क॒स्ता॒भिर्वे॑ते प्र॒बा॒हु॒गा॒ध॒र्नु॒वन् । य ए॒वं
वि॒द्वा॒ऽस॒स्त्र॒यस्त्रि॒ंश॒द॒ह॒मा॒स॒ते॒ सर्व॑ ए॒व प्र॒बा॒हु॒गृ॒ध॒नु॒वन्ति॒ सर्वे॑
ग्रा॒म॒णी॒यं प्रा॒प्नु॒वन्ति॒ पञ्चा॒हा भ॒वन्ति॒ पञ्च॑ वा ऋ॒त॒वः॑ सँव॒त्स॒र

ऋ॒तु॒ष्वे॒व सँ॑व॒त्सरे॒ प्रति॑ ति॒ष्ठन्त्यथो॑ पञ्चा॒क्षरा॑ प॒ङ्क्तिः॑ पा॒ङ्क्तो॑ य॒ज्ञो
य॒ज्ञमे॒वाव रु॒न्धते॑ त्री॒ण्या॑श्चि॒नानि॑ भवन्ति॒ त्रय॑ इ॒मे लो॒का ए॒- [] 19

TS 7.4.5.2 - Padam

अ॒हः । ए॒कः । अ॒भज॑त । अ॒हः । ए॒कः । ता॒भिः । वै । ते ।
प्र॒बाहु॑गि॒ति प्र – बा॒हुक् । आ॒ध्नु॒वन् । ये । ए॒वम् । वि॒द्वाँ॒सः ।
त्रय॑स्त्रि॒ंश॒दह॑मि॒ति त्रय॑स्त्रि॒ंश॒त् – अ॒हम् । आ॒स॒ते । स॒र्वे॑ । ए॒व ।
प्र॒बाहु॑गि॒ति प्र – बा॒हुक् । ऋ॒ध्नु॒वन्ति॑ । स॒र्वे॑ । ग्रा॒म॒णी॒यमि॒ति
ग्रा॒म – नी॒यम् । प्रे॒ति । आ॒प्नु॒वन्ति॑ । पञ्चा॒हा इति॑ पञ्च॒-अ॒हाः ।
भ॒वन्ति॑ । पञ्च॑ । वै । ऋ॒त॒वः । सँ॑व॒त्सर॑ इति॒ सं – व॒त्सरः॑ ।
ऋ॒तुषु॑ । ए॒व । सँ॑व॒त्सर॑ इति॒ सं-व॒त्सरे॑ । प्र॒ती॒ति । ति॒ष्ठन्ति॑ ।
अथो॒ इति॑ । पञ्चा॒क्षरे॑ति॒ पञ्च॒-अ॒क्षरा॑ । प॒ङ्क्तिः॑ । पा॒ङ्क्तः॑ । य॒ज्ञः ।
य॒ज्ञम् । ए॒व । अ॒वे॒ति । रु॒न्ध॒ते । त्री॒णि । आ॒श्चि॒नानि॑ । भ॒वन्ति॑ ।
त्रयः॑ । इ॒मे । लो॒काः । ए॒षु । 19 (50)

TS 7.4.5.3

ए॒व लो॒केषु॑ प्र॒ति ति॒ष्ठन्त्य॒थो त्री॒णि वै य॒ज्ञस्यै॑न्द्रि॒याणि॑ ता॒न्येवा॑व
रु॒न्धते॑ वि॒श्वजि॒द्-भ॒वत्य॒न्नाद्य॒स्या वरु॑द्ध्यै॒ सर्व॑पृ॒ष्ठो भ॒वति॑
सर्व॑स्या॒भिजि॒त्यै वा॒ग्वै द्वा॒दशा॒हो यत् पु॒रस्ता॑द् द्वा॒दशा॒ह-मु॒पेयु॑र॒नाप्तां॑
वा॒च-मु॒पेयु॑-रु॒पदा॑सु॒कैषां॑ वा॒क् स्या॑-दु॒परि॑ष्ठाद् द्वा॒दशा॒हमु॒प
य॒न्त्या॒प्तामे॒व वा॒चमु॒प य॒न्ति तस्मा॑-दु॒परि॑ष्ठाद्-वा॒चा व॑दामो

ऽवा॒न्तरं॑ – [] 20

TS 7.4.5.3 - Padam

ए॒व । लो॒केषु॑ । प्र॒तीति॑ । ति॒ष्ठन्ति॑ । अ॒थो इति॑ । त्री॒णि । वै ।
य॒ज्ञस्य॑ । इन्द्रि॒याणि॑ । ता॒नि । ए॒व । अ॒वेति॑ । रु॒न्धते॑ ।
वि॒श्वजि॒दिति॑ वि॒श्व – जि॒त् । भ॒वति॑ । अ॒न्नाद्य॒स्येत्य॒न्न – अ॒द्यस्य॑ ।
अ॒वरु॑द्ध्यै॒ इत्य॑व – रु॒द्ध्यै । सर्व॑पृ॒ष्ठ इति॑ सर्व॑ – पृ॒ष्ठः ।
भ॒वति॑ । सर्व॑स्य । अ॒भिजि॒त्या इत्य॑भि – जि॒त्यै । वा॒क् । वै ।
द्वा॒दशा॒ह इति॑ द्वा॒दश – अ॒हः । यत् । पु॒रस्ता॑त् । द्वा॒दशा॒हमि॒ति
द्वा॒दश – अ॒हम् । उ॒पेयु॑रि॒त्युप॑-इ॒युः । अ॒नाप्ता॑म् । वा॒चम् । उ॒पेति॑ ।

इ॒युः । उ॒प॒दा॒सु॒के॒त्यु॒प – दा॒सु॒का । ए॒षाम् । वाक् । स्या॒त् ।
उ॒परि॒ष्ठात् । द्वा॒द॒शा॒ह॒मि॒ति॒ द्वा॒द॒श – अ॒हम् । उ॒पे॒ति॒ । य॒न्ति॒ ।
आ॒प्ता॒म् । ए॒व । वा॒चम् ॥ उ॒पे॒ति॒ । य॒न्ति॒ । तस्मा॑त् । उ॒परि॒ष्ठात् ।
वा॒चा । व॒दामः॑ । अ॒वा॒न्त॒र॒मि॒त्य॒व – अ॒न्त॒रम् । 20 (50)

TS 7.4.5.4

वै॑ द॒श॒रा॒त्रे॒ण प्र॒जा॒प॒तिः॑ प्र॒जा अ॒सृ॒ज॒त यद्-द॒श॒रा॒त्रो भ॒व॒ति॑ प्र॒जा
ए॒व तद् य॒ज॒मा॒नाः सृ॒ज॒न्त ए॒ता॒ ह वा उ॒द॒ङ्कः॑ शौ॒ल्बा॒य॒नः
स॒त्र॒स्य॒र्दि॒र्ध॒मु॒वा॒च यद् द॒श॒रा॒त्रो यद् द॒श॒रा॒त्रो भ॒व॒ति॑ स॒त्र॒स्य॒र्द्ध्य॒
अ॒थो य॒दे॒व पूर्वे॑ष्वह॒स्सु॒ विलो॑म क्रि॒य॒ते तस्यै॒वैषा॑ शान्ति॒र्द्व्य॒नी॒का
वा ए॒ता रा॒त्रयो॑ य॒ज॒मा॒ना वि॒श्व॒जि॒त् स॒हा॒ति॒रा॒त्रे॒ण पूर्वाः॑ षोड॒श स॒हा
() ति॒रा॒त्रे॒णो॒त्त॒राः॑ षोड॒श य ए॒वं वि॒द्वा॒स॒स्त्रय॑स्त्रि॒ंश॒द॒ह॒मा॒स॒त
ऐ॒षां॑ द॒व्य॒नी॒का प्र॒जा जा॒य॒ते ऽति॒रा॒त्रा॒व॒भि॒तो भ॒व॒तः॑ परि॒गृ॒ही॒त्यै ॥ 21

TS 7.4.5.4 - Padam

वै । द॒श॒रा॒त्रे॒णे॒ति॒ द॒श – रा॒त्रे॒ण । प्र॒जा॒प॒ति॒रि॒ति॒ प्र॒जा – प॒तिः॑ ।
प्र॒जा इति॑ प्र – जाः । अ॒सृ॒ज॒त । यत् । द॒श॒रा॒त्र इति॑ द॒श – रा॒त्रः॑ ।

भवति । प्रजा इति प्र – जाः । एव । तत् । यजमानाः । सृजन्ते ।
एताम् । ह । वै । उदङ्कः । शौल्बायनः । सत्रस्य । ऋद्धिम् ।
उवाच । यत् । दशरात्र इति दश – रात्रः । यत् । दशरात्र इति
दश – रात्रः । भवति । सत्रस्य । ऋद्ध्यै । अथो इति । यत् । एव ।
पूर्वेषु । अहस्स्वित्यहः – सु । विलोमेति वि – लोम । क्रियते ।
तस्य । एव । एषा । शान्तिः । द्व्यनीका इति द्वि – अनीकाः । वै ।
एताः । रात्रयः । यजमानाः । विश्वजिदिति विश्व – जित् । सह ।
अतिरात्रेणेत्यति – रात्रेण । पूर्वाः । षोडश । सह () ।
अतिरात्रेणेत्यति – रात्रेण । उत्तरा इत्युत् – तराः । षोडश । ये ।
एवम् । विद्वाँसः । त्रयस्त्रिंशदहमिति त्रयस्त्रिंशत् – अहम् ।
आसते । एति । एषाम् । द्व्यनीकेति द्वि – अनीका ।
प्रजेति प्र – जा । जायते । अतिरात्रावित्यति – रात्रौ । अभितः ।
भवतः । परिगृहीत्या इति परि – गृहीत्यै ॥ 21 (67)
(अहर- त्रेष्व - वान्तरं - षोडश सह - सप्तदश च) (A5)

TS 7.4.6.1

आ॒दि॒त्या अ॒काम॑यन्त सु॒वर्गं॑ लो॒कमि॑यामेति ते सु॒वर्गं॑ लो॒कं न
प्रा॒जा॒न॒न्न सु॒वर्गं॑ लो॒कमा॑यन् त ए॒तम् ष॑ट्त्रिं॒शद् रा॒त्रम॑पश्यन्
तमा॒ह॒रन् ते॒नाय॑जन्त ततो॒ वै ते सु॒वर्गं॑ लो॒कं प्रा॒जा॒न॒न्थ सु॒वर्गं॑
लो॒कमा॑यन् य ए॒वं वि॒द्वा॒सः ष॑ट्त्रिं॒शद् रा॒त्रमा॑सते सु॒वर्गमे॒व
लो॒कं प्र जा॑नन्ति सु॒वर्गं॑ लो॒कं य॑न्ति ज्योति॑रतिरा॒त्रो – [] 22

TS 7.4.6.1 - Padam

आ॒दि॒त्याः । अ॒काम॑यन्त । सु॒वर्गमि॑ति सु॒वः – गम् । लो॒कम् ।
इ॒याम् । इति॑ । ते । सु॒वर्गमि॑ति सु॒वः – गम् । लो॒कम् । न ।
प्रेति॑ । अ॒जा॒न॒न् । न । सु॒वर्गमि॑ति सु॒वः – गम् । लो॒कम् । आ॒य॒न् ।
ते । ए॒तम् । ष॑ट्त्रिं॒शद् रा॒त्रमि॑ति ष॑ट्त्रिं॒शत् – रा॒त्रम् । अ॒प॒श्य॒न् ।
तम् । एति॑ । अ॒ह॒रन् । ते॒न । अ॒य॒ज॒न्त । ततः॑ । वै । ते । सु॒वर्गमि॑ति
सु॒वः – गम् । लो॒कम् । प्रेति॑ । अ॒जा॒न॒न् । सु॒वर्गमि॑ति सु॒वः – गम् ।
लो॒कम् । आ॒य॒न् । ये । ए॒वम् । वि॒द्वा॒सः ।
ष॑ट्त्रिं॒शद् रा॒त्रमि॑ति ष॑ट्त्रिं॒शत् – रा॒त्रम् । आ॒स॒ते ।

सु॒व॒र्गमि॑ति सु॒वः – ग॒म् । ए॒व । लो॒कम् । प्रेति॑ । जा॒न॒न्ति॒ ।

सु॒व॒र्गमि॑ति सु॒वः – ग॒म् । लो॒कम् । य॒न्ति॒ । ज्योतिः॑ ।

अ॒ति॒रा॒त्र इत्य॑ति – रा॒त्रः । 22 (50)

TS 7.4.6.2

भ॒व॒ति॒ ज्योति॑रे॒व पु॒रस्ता॑द् द॒ध॒ते॒ सु॒व॒र्गस्य॑ लो॒कस्या॑नु॒ख्यात्यै॑ षड॒हा
भ॒व॒न्ति॒ षट् वा ऋ॒तव॑ ऋ॒तुष्वे॒व प्र॒ति तिष्ठ॑न्ति च॒त्वारो॑ भ॒व॒न्ति॒ चत॑स्रो
दि॒शो दि॒क्ष्वे॒व प्र॒ति तिष्ठ॑न्त्य॒स॒त्रं वा॑ ए॒तद्-यद॑छ॒न्दोमं॑ य॒च्छ॒न्दो॒मा
भ॒व॒न्ति॒ तेन॑ स॒त्रं दे॒वता॑ ए॒व पृ॒ष्ठैर॑व रु॒न्ध॒ते प॒शूञ्छ॑न्दो॒मैरो॒जो वै वी॒र्यं॑
पृ॒ष्ठानि॑ प॒शवः॑ छ॒न्दो॒मा ओज॑स्ये॒व – [] 23

TS 7.4.6.2 - Padam

भ॒व॒ति॒ । ज्योतिः॑ । ए॒व । पु॒रस्ता॑त् । द॒ध॒ते॒ । सु॒व॒र्गस्ये॑ति
सु॒वः – ग॒स्य । लो॒कस्य॑ । अनु॒ख्यात्या॑ इत्य॒नु – ख्या॒त्यै ।
षड॒हा इति॑ षट् – अ॒हाः । भ॒व॒न्ति॒ । षट् । वै । ऋ॒तवः॑ । ऋ॒तुषु॑ ।
ए॒व । प्र॒तीति॑ । तिष्ठ॑न्ति । च॒त्वारः॑ । भ॒व॒न्ति॒ । चत॑स्रः । दि॒शः ।
दि॒क्षु । ए॒व । प्र॒तीति॑ । तिष्ठ॑न्ति । अ॒स॒त्रम् । वै । ए॒तत् । यत् ।

अ॒छ॒न्दो॒ममि॒त्य॒छ॒न्दः॑ – म॒म् । यत् । छ॒न्दो॒मा इति॑ छ॒न्दः॑ – माः ।
भ॒वन्ति॑ । ते॒न । स॒त्रम् । दे॒वताः॑ । ए॒व । पृ॒ष्ठैः । अ॒वेति॑ । रु॒न्ध॒ते ।
प॒शून् । छ॒न्दो॒मैरि॒ति॑ छ॒न्दः॑ – मैः । ओजः॑ । वै । वी॒र्य॑म् । पृ॒ष्ठानि॑ ।
प॒शवः॑ । छ॒न्दो॒मा इति॑ छ॒न्दः॑ – माः । ओज॑सि । ए॒व । 23 (50)

TS 7.4.6.3

वी॒र्ये॑ प॒शुषु॑ प्र॒ति ति॒ष्ठन्ति॑ षट्-त्रि॒ंशद् रा॒त्रो भ॑वति षट्त्रि॒ंशद॑क्षरा
बृ॒हती॑ बा॒र्हताः॑ प॒शवो॑ बृ॒हत्या॑ ए॒व प॒शून् रु॒न्ध॒ते बृ॒हती॑ छ॒न्दसा॑
स्वा॒राज्य॑मा॒श्नुता॑-श्नु॒वते॒ स्वा॒राज्यं॑ य ए॒वं वि॒द्वाँसः॑ षट्त्रि॒ंशद्
रा॒त्रमा॑सते सु॒वर्गमे॒व लो॒कं य॑न्त्यतिरा॒त्राव॑भितो भवतः सु॒वर्गस्य॑
लो॒कस्य॑ परिगृही॒त्यै ॥ 24

TS 7.4.6.3 - Padam

वी॒र्ये॑ । प॒शुषु॑ । प्र॒तीति॑ । ति॒ष्ठन्ति॑ । षट्त्रि॒ंशद् रा॒त्र इति॑
षट्त्रि॒ंशत्-रा॒त्रः । भ॑वति । षट्त्रि॒ंशद॑क्षरेति षट्त्रि॒ंशत्-अ॒क्षरा॑ ।
बृ॒हती॑ । बा॒र्हताः॑ । प॒शवः॑ । बृ॒हत्या॑ । ए॒व । प॒शून् । अ॒वेति॑ ।
रु॒न्ध॒ते । बृ॒हती॑ । छ॒न्दसा॑म् । स्वा॒राज्य॑मि॒ति स्व – रा॒ज्यम् ।

आ॒श्नु॒त । अ॒श्नु॒वते॑ । स्वा॒रा॒ज्य॒मि॒ति॒ स्व – रा॒ज्य॒म् । ये । ए॒वम् ।
वि॒द्वा॒ँसः । ष॒ट्त्रि॒ंश॒द्रा॒त्रमि॒ति॒ ष॒ट्त्रि॒ंश॒त् – रा॒त्रम् । आ॒स॒ते ।
सु॒व॒र्गमि॒ति॒ सु॒वः – ग॒म् । ए॒व । लो॒कम् । य॒न्ति॒ ।
अ॒ति॒रा॒त्रा॒वि॒त्य॒ति॒ – रा॒त्रौ । अ॒भि॒तः । भ॒व॒तः ।
सु॒व॒र्गस्ये॒ति॒ सु॒वः – ग॒स्य । लो॒कस्य॑ ।
परि॑गृही॒त्या इति॑ परि॑ – गृ॒ही॒त्यै ॥ 24 (36)

(अ॒ति॒रा॒त्र – ओ॒ज॒स्ये॒व – ष॒ट्त्रि॒ंश॒च्च) (A6)

TS 7.4.7.1

व॒सि॒ष्ठो ह॒तपु॒त्रोऽका॒मय॑त वि॒न्दे॒य प्र॒जा॒म॒भि॒ सौ॒दा॒सान् भ॒वे॒यमि॒ति॒
स ए॒तमे॑क॒स्मा-न्न॑पञ्चा॒श-म॑पश्यत् त॒माऽह॑रत् तेना॒यज॑त ततो॒ वै
सोऽवि॑न्दत प्र॒जा॒म॒भि॒ सौ॒दा॒सान्भ॒वद्य॑ ए॒वं वि॒द्वा॒ँस ए॒कस्मा॑-
न्न॑पञ्चा॒शमा॑सते वि॒न्दन्ते॑ प्र॒जा॒म॒भि॒ भ्रा॒तृ॒व्यान् भ॒वन्ति॑
त्रय॑स्त्रि॒वृ॒तोऽग्नि॑ष्ठो॒मा भ॒वन्ति॑ व॒ज्रस्यै॒व मुख॑ँ स॒ ऽश॑यन्ति
द॒श पञ्च॑द॒शा भ॒वन्ति॑ पञ्च॒दशो॑ व॒ज्रो – [] 25

TS 7.4.7.1 - Padam

व॒सि॒ष्ठः । ह॒त॒पु॒त्र इति॑ ह॒त – पु॒त्रः । अ॒का॒म॒य॒त । वि॒न्दे॒य ।
प्र॒जा॒मि॒ति प्र-जा॑म् । अ॒भी॒ति । सौ॒दा॒सान् । भ॒वे॒य॒म् । इति॑ । सः ।
ए॒त॒म् । ए॒क॒स्मा॒न् न॒प॒ञ्चा॒शमि॒त्ये॒क॒स्मा॒त् – न॒प॒ञ्चा॒श॒म् । अ॒प॒श्य॒त् ।
त॒म् । ए॒ति । अ॒हर॒त् । ते॒न । अ॒य॒ज॒त । त॒तः । वै । सः । अ॒वि॒न्द॒त ।
प्र॒जा॒मि॒ति प्र-जा॑म् । अ॒भी॒ति । सौ॒दा॒सान् । अ॒भ॒व॒त् । ये । ए॒व॒म् ।
वि॒द्वा॒ँसः । ए॒क॒स्मा॒न् न॒प॒ञ्चा॒शमि॒त्ये॒क॒स्मा॒त् – न॒प॒ञ्चा॒श॒म् । आ॒स॒ते ।
वि॒न्द॒न्ते॑ । प्र॒जा॒मि॒ति प्र – जा॑म् । अ॒भी॒ति । भ्रा॒तृ॒व्यान् । भ॒व॒न्ति ।
त्र॒यः । त्रि॒वृ॒त इति॑ त्रि – वृ॒तः । अ॒ग्नि॒ष्टो॒मा इत्य॑ग्नि – स्तो॒माः ।
भ॒व॒न्ति । व॒ज्र॒स्य । ए॒व । मु॒ख॒म् । स॒मि॒ति । श्य॒न्ति । द॒श ।
प॒ञ्च॒द॒शा इति॑ प॒ञ्च – द॒शाः । भ॒व॒न्ति ।
प॒ञ्च॒द॒श इति॑ प॒ञ्च – द॒शः । व॒ज्रः । 25 (50)

TS 7.4.7.2

व॒ज्र॒मे॒व भ्रा॒तृ॒व्ये॒भ्यः प्र॑ ह॒र॒न्ति षो॒ड॒शि॒म॒द्-द॒श॒म॒म॒ह-भ॑व॒ति
व॒ज्र ए॒व वी॒र्यं॑ द॒ध॒ति द्वा॒द॒श स॒प्त॒द॒शा भ॑व॒न्त्य॒न्ना॒द्य॒स्या व॑रु॒द्ध्य॒

अथो प्रैव तैर्जायन्ते पृष्ठ्यः षडहो भवति षड्वा ऋतवः षट् पृष्ठानि
पृष्ठैरेवर्तूनन्वारोहन्त्यृतृभिः सँवथ्सरं ते सँवथ्सर एव प्रति तिष्ठन्ति
द्वादशैकविंशा भवन्ति प्रतिष्ठित्या अथो रुचमेवाऽऽत्मन्- [] 26

TS 7.4.7.2 - Padam

वज्रम् । एव । भ्रातृव्येभ्यः । प्रेति । हरन्ति । षोडशिमदिति
षोडशि – मत् । दशमम् । अहः । भवति । वज्रे । एव । वीर्यम् ।
दधति । द्वादश । सप्तदशा इति सप्त – दशाः । भवन्ति ।
अन्नाद्यस्येत्यन्न – अद्यस्य । अवरुद्ध्या इत्यव – रुद्ध्यै । अथो इति ।
प्रेति । एव । तैः । जायन्ते । पृष्ठ्यः । षडह इति षट् – अहः ।
भवति । षट् । वै । ऋतवः । षट् । पृष्ठानि । पृष्ठैः । एव । ऋतून् ।
अन्वारोहन्तीत्यनु – आरोहन्ति । ऋतुभिरित्यृतु – भिः । सँवथ्सरमिति
सं – वथ्सरम् । ते । सँवथ्सर इति सं – वथ्सरे । एव । प्रतीति ।
तिष्ठन्ति । द्वादश । एकविंशा इत्येक – विंशाः । भवन्ति ।
प्रतिष्ठित्या इति प्रति – स्थित्यै । अथो इति । रुचम् । एव ।

आत्मन् । 26 (50)

TS 7.4.7.3

द॒ध॒ते॒ ब॒ह॒वः॑ षोड॒शि॒नो॑ भ॒व॒न्ति॒ वि॒जि॒त्यै॒ ष॒डा॒श्वि॒नानि॑ भ॒व॒न्ति॒ ष॒ड्वा॑
ऋ॒त॒व॑ ऋ॒तु॒ष्वे॒व प्र॒ति ति॒ष्ठ॒न्त्यू॒नाति॒रि॒क्ता॒ वा ए॒ता रा॒त्रय॑ ऊ॒नास्त॒द्-
य॒दे॒क॒स्यै॒ न प॒ञ्चा॒श॒द-ति॒रि॒क्तास्त॒द्-य॒द्-भू॒य॒सी-र॒ष्टाच॒त्वारि॒ंश॒त
ऊ॒नाच्च॑ ख॒लु वा अ॒ति॒रि॒क्ताच्च॑ प्र॒जाप॒तिः प्रा॒जाय॒त ये प्र॒जाका॒माः
प॒शुका॒माः स्यु॒स्त ए॒ता आ॒सी॒रन् प्रै॒व जा॒य॒न्ते प्र॒जया॑ ()
प॒शुभि॒र्वैरा॒जो वा ए॒ष य॒ज्ञो य॒दे॒क॒स्मा-न्न॒प॒ञ्चा॒शो य ए॒वं वि॒द्वाँस्
ए॒क॒स्मा-न्न॒प॒ञ्चा॒शमा॒स॒ते वि॒राज॑मे॒व ग॒च्छ॒न्त्यन्ना॒दा भ॒व॒न्त्य॒ति-
रा॒त्राव॒भितो॑ भ॒व॒तोऽन्ना॒द्य॒स्य परि॑गृही॒त्यै ॥ 27

TS 7.4.7.3 - Padam

द॒ध॒ते॒ । ब॒ह॒वः॑ । षोड॒शि॒नः॑ । भ॒व॒न्ति॒ । वि॒जि॒त्या इति॑ वि - जि॒त्यै ।
ष॒ट् । आ॒श्वि॒नानि॑ । भ॒व॒न्ति॒ । ष॒ट् । वै । ऋ॒त॒वः॑ । ऋ॒तु॒षु । ए॒व ।
प्र॒तीति॑ । ति॒ष्ठ॒न्ति॒ । ऊ॒नाति॒रि॒क्ता इत्यून॑ - अ॒ति॒रि॒क्ताः । वै । ए॒ताः ।
रा॒त्रयः॑ । ऊ॒नाः । तत् । यत् । ए॒क॒स्यै॑ । न । प॒ञ्चा॒शत् ।
अ॒ति॒रि॒क्ता इत्य॑ति - रि॒क्ताः । तत् । यत् । भू॒य॒सीः ।

अ॒ष्टाच॑त्वारि॒ंशत॑ इत्य॒ष्टा-च॑त्वारि॒ंशतः॑ । ऊ॒नात् । च । ख॒लु । वै ।
 अति॑रिक्ता॒दित्य॑ति-रिक्तात् । च । प्र॒जाप॑तिरिति प्र॒जा - प॑तिः । प्रेति॑ ।
 अजा॑यत । ये । प्र॒जाका॑मा इति प्र॒जा - का॑माः । प॒शुका॑मा इति
 प॒शु - का॑माः । स्युः । ते । ए॒ताः । आ॒सीर॑न् । प्रेति॑ । ए॒व ।
 जा॒यन्ते॑ । प्र॒जये॑ति प्र - जया॑ () । प॒शुभि॑रिति प॒शु - भिः॑ ।
 वैरा॑जः । वै । ए॒षः । य॒ज्ञः । यत् । ए॒कस्मा॑न्नपञ्चा॒श
 इत्ये॑कस्मात् - नपञ्चा॒शः । ये । ए॒वम् । वि॒द्वाँसः॑ ।
 ए॒कस्मा॑न्नपञ्चा॒शमित्ये॑कस्मात् - नपञ्चा॒शम् । आ॒सते॑ ।
 विरा॑जमिति वि - राज॑म् । ए॒व । ग॒च्छ॒न्ति । अ॒न्नादा॑ इत्य॒न्न-अ॑दाः ।
 भव॑न्ति । अति॑रात्रावित्य॑ति - रात्रौ॑ । अ॒भितः॑ । भव॑तः ।
 अ॒न्नाद्य॑स्येत्य॒न्न-अ॑द्यस्य । परि॑गृहीत्या इति परि॑-गृहीत्यै ॥ 27 (72)
 (व॒ज्र - आ॒त्मन् - प्र॒जया॑ - द्वावि॑ंशतिश्च) (A7)

TS 7.4.8.1

सँव॑त्सराय दीक्षिष्यमाणा ए॒काष्ट॑कायां दीक्षे॑रन्नेषा वै सँव॑त्सरस्य
 पत्नी॑ यदे॒काष्ट॑कैतस्यांँवा ए॒ष ए॒ताँ रात्रिंँ व॑सति साक्षादे॒व

सँव॒थ्स॒रमा॒रभ्य॑ दी॒क्षन्ते॑ आ॒र्तं वा॑ ए॒ते सँव॒थ्स॒रस्या॒भि दी॒क्षन्ते॑
य ए॒का॒ष्टका॒यां दी॒क्षन्ते॑ ऽन्त॒नामा॒नावृ॒तू भ॒वतो॑ व्य॒स्तं वा॑ ए॒ते
सँव॒थ्स॒रस्या॒भि दी॒क्षन्ते॑ य ए॒का॒ष्टका॒यां दी॒क्षन्ते॑ ऽन्त॒नामा॒नावृ॒तू
भ॒वतः॑ फ॒ल्गु॒नी पू॒र्णमा॒से दी॒क्षे॒रन् मुखं॑ वा॑ ए॒तथ् – [] 28

TS 7.4.8.1 - Padam

सँव॒थ्स॒राये॑ति सं – व॒थ्स॒राय॑ । दी॒क्षि॒ष्यमा॑णाः ।
ए॒का॒ष्टका॒यामि॒त्येक॑ – अ॒ष्टका॒याम् । दी॒क्षे॒रन् । ए॒षा । वै ।
सँव॒थ्स॒रस्ये॑ति सं – व॒थ्स॒रस्य॑ । प॒त्नी । यत् ।
ए॒का॒ष्टके॑त्येक॑-अ॒ष्टका॑ । ए॒तस्या॑म् । वै । ए॒षः । ए॒ताम् । रा॒त्रिम् ।
व॒सति॑ । सा॒क्षादि॑ति स – अ॒क्षात् । ए॒व । सँव॒थ्स॒रमि॑ति
सं – व॒थ्स॒रम् । आ॒रभ्ये॑त्या – र॒भ्य । दी॒क्षन्ते॑ । आ॒र्तम् । वै । ए॒ते ।
सँव॒थ्स॒रस्ये॑ति सं – व॒थ्स॒रस्य॑ । अ॒भीति॑ । दी॒क्षन्ते॑ । ये ।
ए॒का॒ष्टका॒यामि॒त्येक॑ – अ॒ष्टका॒याम् । दी॒क्षन्ते॑ ।
अ॒न्त॒नामा॒नावि॑त्यन्त॑- ना॒मानौ । ऋ॒तू इति॑ । भ॒वतः॑ । व्य॒स्तमि॑ति
वि-अ॒स्तम् । वै । ए॒ते । सँव॒थ्स॒रस्ये॑ति सं – व॒थ्स॒रस्य॑ । अ॒भीति॑ ।

दी॒क्ष॒न्ते । ये । ए॒का॒ष्ट॒का॒या॒मि॒त्ये॒क॒ – अ॒ष्ट॒का॒या॒म् । दी॒क्ष॒न्ते ।
अ॒न्त॒ना॒मा॒ना॒वि॒त्य॒न्त॒ – ना॒मा॒नौ । ऋ॒तू इति । भ॒व॒तः ।
फ॒ल्गु॒नी॒पू॒र्ण॒मा॒स इति॑ फ॒ल्गु॒नी – पू॒र्ण॒मा॒से । दी॒क्षे॒रन् । मु॒ख॒म् । वै ।

ए॒तत् । 28 (50)

TS 7.4.8.2

सँ॒व॒थ्स॒रस्य॑ यत् फ॒ल्गु॒नी पू॒र्ण॒मा॒सो मु॒ख॒त ए॒व सँ॒व॒थ्स॒रमा॒रभ्य॑
दी॒क्ष॒न्ते तस्यै॒कै॒व नि॒र्या यथ् साम्मे॒ध्ये वि॒षू॒वा॒न्थ् संप॑द्यते
चि॒त्रा॒पू॒र्ण॒मा॒से दी॒क्षे॒रन् मु॒खं वा ए॒तथ् सँ॒व॒थ्स॒रस्य॑ यच्चि॒त्रा॒पू॒र्ण॒मा॒सो
मु॒ख॒त ए॒व सँ॒व॒थ्स॒रमा॒रभ्य॑ दी॒क्ष॒न्ते तस्य॑ न का च॒न नि॒र्या भ॑वति
च॒तु॒रहे॑ पु॒रस्ता॑त् पौ॒र्ण॒मा॒स्यै दी॒क्षे॒रन् तेषा॑मे॒का॒ष्ट॒का॒यां क्र॒यः सं प॑द्यते
तेनै॒का॒ष्ट॒कां न छ॒म्बट् कु॑र्वन्ति तेषां – [] 29

TS 7.4.8.2 - Padam

सँ॒व॒थ्स॒रस्ये॑ति सं – व॒थ्स॒रस्य॑ । यत् । फ॒ल्गु॒नी॒पू॒र्ण॒मा॒स इति॑
फ॒ल्गु॒नी – पू॒र्ण॒मा॒सः । मु॒ख॒तः । ए॒व । सँ॒व॒थ्स॒रमि॑ति सं – व॒थ्स॒रम् ।

आ॒र॒भ्ये॒त्या॑ – र॒भ्य॑ । दी॒क्ष॒न्ते॑ । तस्य॑ । ए॒का॑ । ए॒व । नि॒र्ये॑ति
निः – या । य॒थ् । सां॑मे॒घ्य इति॑ सां – मे॒घ्ये॑ । वि॒षू॒वा॒नि॒ति॑
वि॒षु – वा॒न् । संप॑द्य॒त इति॑ सं – प॑द्यते । चि॒त्रा॒पू॒र्ण॒मा॒स इति॑
चि॒त्रा – पू॒र्ण॒मा॒से । दी॒क्षे॒रन्॑ । मु॒ख॒म् । वै । ए॒तत् । सँ॒व॒थ्स॒र॒स्ये॑ति
सं – व॒थ्स॒र॒स्य॑ । यत् । चि॒त्रा॒पू॒र्ण॒मा॒स इति॑ चि॒त्रा – पू॒र्ण॒मा॒सः ।
मु॒ख॒तः । ए॒व । सँ॒व॒थ्स॒र॒मि॒ति॑ सं – व॒थ्स॒र॒म् । आ॒र॒भ्ये॒त्या॑ – र॒भ्य॑ ।
दी॒क्ष॒न्ते॑ । तस्य॑ । न । का । च॒न । नि॒र्ये॑ति निः – या । भ॒व॒ति॑ ।
च॒तु॒र॒ह इति॑ च॒तुः – अ॒हे । पु॒र॒स्ता॑त् । पौ॒र्ण॒मा॒स्या इति॑ पौ॒र्ण – मा॒स्यै॑ ।
दी॒क्षे॒रन्॑ । तेषा॑म् । ए॒का॒ष्ट॒का॒या॒मि॒त्ये॒क – अ॒ष्ट॒का॒या॒म् । क्र॒यः ।
स॒मि॒ति॑ । प॑द्यते । ते॒न । ए॒का॒ष्ट॒का॒मि॒त्ये॒क – अ॒ष्ट॒का॒म् । न । छ॒म्ब॒ट् ।
कु॒र्व॒न्ति॑ । तेषा॑म् । 29 (50)

TS 7.4.8.3

पूर्व॑प॒क्षे सु॒त्या सं प॑द्यते पूर्व॑प॒क्षं मा॒सा अ॒भि सं प॑द्यन्ते ते पूर्व॑प॒क्ष
उत् ति॑ष्ठन्ति तानु॑त्तिष्ठ॒त ओष॑धयो व॒न॒स्प॒त॒योऽनू॑त् ति॑ष्ठन्ति तान्

क॒ल्या॒णी की॒र्तिर॒नूत् ति॒ष्ठत्य॑रा॒थ् सु॒रिमे॑ यज॒माना॑ इति॒ तद॒नु सर्वे॑
रा॒द्धनु॑वन्ति ॥ 30

TS 7.4.8.3 - Padam

पूर्व॑पक्ष इति॒ पूर्व – प॒क्षे । सु॒त्या । समि॑ति । प॒द्यते॑ । पूर्व॑पक्षमि॒ति
पूर्व – प॒क्षम् । मा॒साः । अ॒भि । समि॑ति । प॒द्यन्ते॑ । ते । पूर्व॑पक्ष
इति॒ पूर्व–प॒क्षे । उदि॑ति । ति॒ष्ठन्ति॑ । तान् । उ॒त्तिष्ठ॑त इत्यु॒त्–तिष्ठ॑तः ।
ओष॑धयः । वन॑स्पतयः । अनु॑ । उदि॑ति । ति॒ष्ठन्ति॑ । तान् । क॒ल्या॒णी ।
की॒र्तिः । अनु॑ । उदि॑ति । ति॒ष्ठति॑ । अ॒रा॒त्सुः॑ । इ॒मे । यज॒मानाः॑ ।
इति॑ । तत् । अ॒न्वि॒ति । सर्वे॑ । रा॒द्धनु॑वन्ति ॥ 30 (34)

(एत – च्छब्दकुर्वन्ति तेषां – चतुस्त्रिंशच्च) (A8)

TS 7.4.9.1

सु॒वर्गं॑ वा ए॒ते लो॒कं य॑न्ति॒ ये स॒त्रमु॑पयन्त्यभी॒न्धत॑ ए॒व
दी॒क्षाभि॑रा॒त्मानं॑ श्रपयन्त उप॒सद्भि॒र्द्वाभ्यां॑ लो॒माव॑ द्यन्ति
द्वाभ्यां॑ त्वचं॒ द्वाभ्या॑मसृद् द्वाभ्यां॑ मा॒सं द्वाभ्या॑मस्थि॒ द्वाभ्यां॑
म॒ज्जान॑मा॒त्मदक्षि॑णं॒ वै स॒त्रमा॒त्मानमे॒व दक्षि॑णां नी॒त्वा सु॒वर्गं॑

लोकं॑ यन्ति॑ शिखामनु॑ प्र वपन्त॑ ऋद्ध्य॑ अथो॑ रघीया॑ऽसः
सुवर्गं॑ लोकम॑यामेति॑ () ॥ 31

TS 7.4.9.1 - Padam

सुवर्गमिति॑ सुवः – गम् । वै । एते । लोकम् । यन्ति । ये । सत्रम् ।
उपयन्तीत्युप॑ – यन्ति । अभीति॑ । इन्धते । एव । दीक्षाभिः ।
आत्मानम् । श्रपयन्ते । उपसद्भिरित्युपसत् – भिः । द्वाभ्याम् ।
लोम । अवेति । द्यन्ति । द्वाभ्याम् । त्वचम् । द्वाभ्याम् । असृत् ।
द्वाभ्याम् । मा॑ऽसम् । द्वाभ्याम् । अस्थि । द्वाभ्याम् । मज्जानम् ।
आत्मदक्षिणमित्यात्म – दक्षिणम् । वै । सत्रम् । आत्मानम् । एव ।
दक्षिणाम् । नीत्वा । सुवर्गमिति॑ सुवः – गम् । लोकम् । यन्ति ।
शिखाम् । अनु । प्रेति । वपन्ते । ऋद्ध्यै॑ । अथो॑ इति ।
रघीया॑ऽसः । सुवर्गमिति॑ सुवः – गम् । लोकम् । अयाम् ।
इति॑ () ॥ 31 (50) (सुवर्गं॑ – पञ्चाशत्) (A9)

TS 7.4.10.1

ब्र॒ह्म॒वादि॒नो॑ वदन्त्यतिरात्रः॑ पर॒मो य॒ज्ञक्र॒तूनां॑ कस्मात् तं प्रथ॒ममुप॑
यन्तीत्येतद्वा॑ अ॒ग्नि॒ष्टोमं॑ प्रथ॒ममुप॑ यन्त्यथोक्थ्यमथ॑ षोड॒शि॒न-
मथातिरात्र-मनु॒पूर्वमे॒वैतद्-य॒ज्ञक्र॒तूनुपेत्य॑ ताना॒लभ्य॑ परिगृह्य
सोममे॒वैतत् पिब॑न्त आसते॒ ज्योति॑ष्टोमं प्रथ॒ममुप॑ यन्ति॒ ज्योति॑ष्टोमो
वै स्तोमा॑नां मुखं॑ मुखत॒ एव॑ स्तोमा॒न् प्र यु॑ज्जते ते - [] 32

TS 7.4.10.1 - Padam

ब्र॒ह्म॒वादि॒न इति॑ ब्रह्म - वादि॒नः । वद॑न्ति । अ॒तिरा॒त्र इत्य॑ति-रात्रः ।
पर॒मः । य॒ज्ञक्र॒तूनामि॑ति य॒ज्ञ-क्र॒तूनाम् । कस्मा॑त् । तम् । प्रथ॒मम् ।
उपे॑ति । यन्ति॒ । इति॑ । ए॒तत् । वै । अ॒ग्नि॒ष्टोममि॑त्यग्नि - स्तोमम् ।
प्रथ॒मम् । उपे॑ति । यन्ति॒ । अथ॑ । उ॒क्थ्यम् । अथ॑ । षोड॒शि॒नम् ।
अथ॑ । अ॒तिरा॒त्रमि॑त्यति - रात्रम् । अ॒नुपूर्व॑मित्यनु - पूर्वम् । ए॒व ।
ए॒तत् । य॒ज्ञक्र॒तूनि॑ति य॒ज्ञ - क्र॒तून् । उ॒पेत्ये॑त्युप - इत्य॑ । तान् ।
आ॒लभ्ये॑त्या - लभ्य॑ । परि॒गृह्ये॑ति परि - गृह्य॑ । सोमम् । ए॒व ।
ए॒तत् । पिब॑न्तः । आ॒सते॑ । ज्योति॑ष्टोममि॒ति ज्योतिः॑ - स्तोमम् ।

प्र॒थ॒मम् । उ॒पे॒ति॑ । य॒न्ति॑ । ज्यो॒ति॒ष्ठो॒म॒ इति॑ ज्यो॒तिः॑ – स्तो॒मः॑ । वै ।
स्तो॒मा॒ना॒म् । मु॒खम् । मु॒ख॒तः॑ । ए॒व । स्तो॒मा॒न् । प्रे॒ति॑ ।

यु॒ञ्ज॒ते॑ । ते । 32 (50)

TS 7.4.10.2

स॒स्तु॒ता॒ वि॒रा॒ज॒म॒भि॒ सं प॒द्य॒न्ते॑ द्वे च॒र्चा॒व॒ति॑ रि॒च्ये॒ते॒ ए॒क॒या॒
गौ॒र॒ति॒रि॒क्त॒ ए॒क॒या॒ऽऽयु॒रू॒नः॑ सु॒व॒र्गो॒ वै लो॒को॒ ज्यो॒ति॒रू॒र्ग॒-वि॒रा॒ट्-
थ्सु॒व॒र्ग॒मे॒व ते॒न लो॒कं य॑न्ति रथ॒न्त॒रं दि॒वा भ॑वति रथ॒न्त॒रं
न॒क्त॒मि॒त्याहु॑-ब्र॒ह्म॒वा॒दि॒नः॑ के॒न तद॒जा॒मी॒ति॑ सौ॒भ॒रं तृ॒ती॒य॒स॒व॒ने
ब्र॒ह्म॒सा॒मं बृ॒ह॒त् तन्म॑द्ध्यतो दधति वि॒धृत्यै॑ ते॒ना॒जा॒मि॑ ॥ 33

TS 7.4.10.2 - Padam

स॒स्तु॒ता॒ इति॑ सं – स्तु॒ताः॑ । वि॒रा॒ज॒मि॒ति॑ वि – रा॒ज॒म् । अ॒भि॒ ।
स॒मि॒ति॑ । प॒द्य॒न्ते॑ । द्वे इति॑ । च । ऋ॒चौ॑ । अ॒ती॒ति॑ । रि॒च्ये॒ते॒ इति॑ ।
ए॒क॒या॒ । गौः॑ । अ॒ति॒रि॒क्त॒ इत्य॑ति – रि॒क्तः॑ । ए॒क॒या॒ । आ॒युः॑ । ऊ॒नः॑ ।
सु॒व॒र्ग॒ इति॑ सु॒वः॑ – गः॑ । वै । लो॒कः॑ । ज्यो॒तिः॑ । ऊ॒र्क् । वि॒रा॒डि॒ति॑
वि – रा॒ट् । सु॒व॒र्ग॒मि॒ति॑ सु॒वः॑-गम् । ए॒व । ते॒न॑ । लो॒क॒म् । य॒न्ति॑ ।

रथ॑न्तरमि॑ति रथं॑ – तर॑म् । दि॒वा॑ । भ॒वति॑ । रथ॑न्तरमि॑ति रथं॑-तर॑म् ।
नक्त॑म् । इति॑ । आ॒हुः॑ । ब्र॒ह्म॒वादि॑न इति॑ ब्र॒ह्म-वा॑दिनः॑ । के॒न॑ । तत् ।
अजा॑मि । इति॑ । सौ॒भर॑म् । तृ॒तीय॑स॒वन इति॑ तृतीय॑ – स॒वने॑ ।
ब्र॒ह्म॒सा॒ममि॑ति ब्र॒ह्म – सा॒मम् । बृ॒हत् । तन् । म॒द्ध्य॒तः ।
द॒धति॑ । वि॒धृ॒त्या इति॑ वि – धृ॒त्यै॑ । ते॒न॑ । अजा॑मि ॥ 33 (49)

(त – ए॒कान्न॑पञ्चा॒शच्च॑) (A10)

TS 7.4.11.1

ज्योति॑ष्टोमं प्रथ॑ममुप॑ यन्त्यस्मि॒न्ने॒व ते॒न॑ लो॒के प्र॑ति तिष्ठन्ति॑ गो॒ष्टोमं॑
द्वि॒तीय॑मुप॑ यन्त्यन्तरि॑क्ष ए॒व ते॒न॑ प्र॑ति तिष्ठन्त्यायु॑ष्टोमं तृ॒तीय॑मुप॑
यन्त्यमुष्मि॑न्ने॒व ते॒न॑ लो॒के प्र॑ति तिष्ठन्तीयं॑ वा॒व ज्योति॑रन्तरि॑क्षं
गौ॒रसा॑वायु-र्यदे॒तान्थ्-स्तो॑मा-नुप॑यन्त्येष्वे॒व तल्लो॑केषु स॒त्रिणः॑
प्र॑ति तिष्ठन्तो॑ यन्ति॒ ते स॑स्तु॒ता वि॒राज॑ – [] 34

TS 7.4.11.1 - Padam

ज्योति॑ष्टोममि॒ति ज्योतिः॑ – स्तो॒मम् । प्र॒थम॑म् । उपे॑ति । यन्ति॑ ।
अ॒स्मिन् । ए॒व । ते॒न॑ । लो॒के । प्र॒तीति॑ । तिष्ठ॑न्ति ।

गो॑ष्टो॒ममि॑ति गो – स्तो॒मम् । द्वि॒तीय॑म् । उपे॑ति । य॒न्ति । अ॒न्तरि॑क्षे ।
ए॒व । तेन॑ । प्र॒तीति॑ । ति॒ष्ठन्ति॑ । आयु॑ष्टो॒ममित्या॑युः – स्तो॒मम् ।
तृ॒तीय॑म् । उपे॑ति । य॒न्ति । अ॒मुष्मि॑न् । ए॒व । तेन॑ । लो॒के । प्र॒तीति॑ ।
ति॒ष्ठन्ति॑ । इ॒यम् । वाव॑ । ज्यो॑तिः । अ॒न्तरि॑क्षम् । गौः । अ॒सौ ।
आयुः॑ । यत् । ए॒तान् । स्तो॒मान् । उप॒यन्ती॑त्युप – य॒न्ति । ए॒षु ।
ए॒व । तत् । लो॒केषु॑ । स॒त्रिणः॑ । प्र॒ति॒ति॒ष्ठन्ति॑ इति॑ प्र॒ति – ति॒ष्ठन्तः॑ ।
य॒न्ति । ते । स॒स्तु॒ता इति॑ सं – स्तु॒ताः ।
वि॒राज॑मि॒ति वि॑ – रा॒जम् । 34 (50)

TS 7.4.11.2

–म॒भि संप॑द्यन्ते॒ द्वे च॑र्चाव॒ति रि॑च्येते॒ एक॑या गौ॒रति॑रि॒क्त
ए॒कया॑ऽऽयु॒रूनः॑ सु॒वर्गो॑ वै लो॒को ज्यो॑ति॒रूर्ग॑–वि॒राडूर्ज॑–मे॒वाव॑
रु॒न्धते॒ ते न॑ क्षु॒धा ऽऽर्ति॑मा॒र्च्छन्त्य॑क्षो॒धुका॑ भव॒न्ति क्षु॑थ् सं॒बाधा॑ इ॒व
हि स॒त्रिणो॑ ऽग्नि॒ष्टोमा॑व॒भितः॑ प्र॒धी तावु॑क्थ्या॑ म॒द्ध्ये न॑भ्यं॒ तत् तदे॒तत्
प॒रिय॑द्–दे॒वच॑क्रं॒ यदे॒तेन॑ – [] 35

TS 7.4.11.2 - Padam

अ॒भि । स॒मि॒ति॑ । प॒द्य॒न्ते॑ । द्वे॒ इति॑ । च॒ । ऋ॒चौ॑ । अ॒ती॒ति॑ । रि॒च्ये॒ते॑
इति॑ । ए॒क॒या॑ । गौः । अ॒ति॒रि॒क्त॒ इत्य॑ति – रि॒क्तः॑ । ए॒क॒या॑ । आ॒युः॑ ।
ऊ॒नः॑ । सु॒व॒र्ग॑ इति॑ सु॒वः॑ – गः॑ । वै । लो॒कः॑ । ज्यो॒तिः॑ । ऊ॒र्क् ।
वि॒रा॒डि॒ति॑ वि – राट् । ऊ॒र्ज॑म् । ए॒व । अ॒वे॒ति॑ । रु॒न्ध॒ते॑ । ते । न ।
क्षु॒धा । आ॒र्ति॑म् । ए॒ति॑ । ऋ॒च्छ॒न्ति॑ । अ॒क्षो॑धु॒काः॑ । भ॒व॒न्ति॑ ।
क्षु॒थ्स॒म्बा॒धा॒ इति॑ क्षु॒त् – स॒म्बा॒धाः॑ । इ॒व । हि । स॒न्नि॒णः॑ ।
अ॒ग्नि॒ष्टो॒मा॒वि॒त्य॒ग्नि॑ – स्तो॒मौ । अ॒भि॒तः॑ । प्र॒धी॑ इति॑ प्र – धी । तौ ।
उ॒क्थ्याः॑ । म॒द्ध्ये॑ । न॒भ्य॑म् । तत् । तत् । ए॒तत् । प॒रि॒य॒दि॒ति॑
प॒रि – यत् । दे॒व॒च॒क्र॒मि॒ति॑ दे॒व – च॒क्र॑म् । यत् । ए॒ते॒न॑ । 35 (50)

TS 7.4.11.3

ष॒ड॒हे॒न॑ य॒न्ति॑ दे॒व॒च॒क्र॒मे॒व॑ स॒मा॒रो॒ह॒न्त्य॑रि॒ष्ट्यै॑ ते स्व॒स्ति॑ स॒म॒श्नु॑व॒ते॑
ष॒ड॒हे॒न॑ य॒न्ति॑ ष॒ड्वा॑ ऋ॒त॒व॑ ऋ॒तु॒ष्वे॒व॑ प्र॒ति॑ ति॒ष्ठ॒न्त्यु॒भय॑तौ॑ ज्यो॒ति॒षा॑
य॒न्त्यु॒भय॑त ए॒व सु॒व॒र्गे॑ लो॒के॑ प्र॒ति॒ति॒ष्ठ॒न्तो॑ य॒न्ति॑ द्वौ॑ ष॒ड॒हौ॑ भ॒व॒त॒स्ता॒नि॑

द्वा॒द॒शा॒हा॒नि॒ सं प॒द्य॒न्ते॒ द्वा॒द॒शो॒ वै पु॒रु॒षो॒ द्वे स॒क्थ्यौ॑ द्वौ बा॒हू आ॒त्मा
च शि॒रश्च॑ च॒त्वार्य॑ङ्गानि॒ स्तनौ॑ द्वा॒द॒शौ – [] 36

TS 7.4.11.3 - Padam

ष॒ड॒हे॒ने॒ति॒ षट् – अ॒हे॒न॒ । य॒न्ति॑ । दे॒व॒च॒क्र॒मि॒ति॒ दे॒व॒-च॒क्र॒म् । ए॒व ।
स॒मा॒रो॒ह॒न्ती॒ति॒ सं – आ॒रो॒ह॒न्ति॑ । अ॒रि॒ष्ट्यै॑ । ते । स्व॒स्ति॑ । स॒मि॒ति॑ ।
अ॒श्नु॒व॒ते॒ । ष॒ड॒हे॒ने॒ति॒ षट् – अ॒हे॒न॒ । य॒न्ति॑ । षट् । वै । ऋ॒त॒वः॑ ।
ऋ॒तु॒षु॑ । ए॒व । प्र॒ती॒ति॑ । ति॒ष्ठ॒न्ति॑ ।
उ॒भ॒य॒तो॒ज्यो॒ति॒षे॒त्यु॒भ॒य॒तः॑-ज्यो॒ति॒षा॑ । य॒न्ति॑ । उ॒भ॒य॒तः॑ । ए॒व । सु॒व॒र्ग
इ॒ति॒ सु॒वः॑ – गे । लो॒के॑ । प्र॒ति॒ति॒ष्ठ॒न्त॒ इति॑ प्र॒ति॒-ति॒ष्ठ॒न्तः॑ । य॒न्ति॑ ।
द्वौ । ष॒ड॒हा॒वि॒ति॒ षट्-अ॒हौ॑ । भ॒व॒तः॑ । ता॒नि॑ । द्वा॒द॒श॑ । अ॒हा॒नि॑ ।
स॒मि॒ति॑ । प॒द्य॒न्ते॒ । द्वा॒द॒शः॑ । वै । पु॒रु॒षः॑ । द्वे इति॑ । स॒क्थ्यौ॑ । द्वौ ।
बा॒हू इति॑ । आ॒त्मा॑ । च॒ । शि॒रः॑ । च॒ । च॒त्वा॒रि॑ । अ॒ङ्गा॒नि॑ । स्त॒नौ॑ ।
द्वा॒द॒शौ । 36 (50)

TS 7.4.11.4

तत् पुरुषमनु पर्यावर्तन्ते त्रयः षडहा भवन्ति तान्यष्टादशाहानि
सं पद्यन्ते नवान्यानि नवान्यानि नव वै पुरुषे प्राणास्तत् प्राणाननु
पर्यावर्तन्ते चत्वारः षडहा भवन्ति तानि चतुर्विंशतिरहानि सं पद्यन्ते
चतुर्विंशतिरर्द्धमासाः सँवत्सरस्तथ् सँवत्सरमनु पर्यावर्तन्ते
ऽप्रतिष्ठितः सँवत्सर इति खलु वा आहुर्वर्षीयान् प्रतिष्ठाया
इत्येतावद्वै () सँवत्सरस्य ब्राह्मणं यावन्मासो मासिमास्येव
प्रतिष्ठन्तो यन्ति ॥ 37

TS 7.4.11.4 - Padam

तत् । पुरुषम् । अन्विति । पर्यावर्तन्त इति परि – आवर्तन्ते । त्रयः ।
षडहा इति षट् – अहाः । भवन्ति । तानि । अष्टादशेत्यष्टा – दश ।
अहानि । समिति । पद्यन्ते । नव । अन्यानि । नव । अन्यानि । नव ।
वै । पुरुषे । प्राणा इति प्र – अनाः । तत् । प्राणानिति प्र-अनान् ।
अन्विति । पर्यावर्तन्त इति परि – आवर्तन्ते । चत्वारः । षडहा इति
षट्-अहाः । भवन्ति । तानि । चतुर्विंशतिरिति चतुः-विंशतिः ।

अ॒हा॒नि । स॒मि॒ति॒ । प॒द्य॒न्ते॒ । च॒तुर्विं॑शतिरिति॒ च॒तुः॑ – वि॒ंश॒तिः॑ ।
 अ॒र्ध॒मा॒सा इत्य॑र्ध – मा॒साः । सँ॒व॒थ्स॒र इति॑ सं – व॒थ्स॒रः ।
 तत् । सँ॒व॒थ्स॒रमि॒ति सं – व॒थ्स॒रम् । अ॒न्वि॒ति॒ । प॒र्या॒व॒र्त॒न्त इति॑
 परि – आ॒व॒र्त॒न्ते । अ॒प्र॒ति॒ष्ठि॒त इत्य॑प्रति – स्ति॒तः । सँ॒व॒थ्स॒र इति॑
 सं – व॒थ्स॒रः । इति॑ । ख॒लु । वै । आ॒हुः । व॒र्षी॒यान् । प्र॒ति॒ष्ठा॒या
 इति॑ प्र॒ति – स्था॒याः॑ । इति॑ । ए॒ता॒वत् । वै () । सँ॒व॒थ्स॒रस्ये॑ति
 सं – व॒थ्स॒रस्य॑ । ब्रा॒ह्म॒णम् । या॒वत् । मा॒सः । मा॒सि॒मा॒सी॒ति
 मा॒सि – मा॒सि॒ । ए॒व । प्र॒ति॒ति॒ष्ठ॒न्त इति॑ प्र॒ति – ति॒ष्ठ॒न्तः ।

य॒न्ति ॥ 37 (58)

(वि॒राज॑ – मे॒तेन॑ – द्वा॒द॒शा – वे॒ता॒व॒द्वा – अ॒ष्टौ च॑) (A11)

TS 7.4.12.1

मे॒ष॒स्त्वा प॒च॒तैर॑व॒तु लो॒हि॒त॒ग्री॒वः छा॒गैः॑ श॒ल्म॒लि॒र्वृ॒द्ध्य॑ प॒र्णो ब्र॒ह्म॒णा
 प्ल॒क्षो मे॒धेन॑ न्य॒ग्रो॒धश्च॑म॒सैरु॑दु॒म्बर॑ ऊ॒र्जा गा॒य॒त्री छ॒न्दो॒भिस्त्रि॒वृ॒थ्
 स्तो॒मैर॑व॒न्तीः स्था॒व॒न्ती॒स्त्वाऽव॑न्तु प्रि॒यं त्वा॑ प्रि॒याणां॑ व॒र्षि॒ष्ठि॒मा॒प्या॒नां
 नि॒धी॒नां त्वा॑ नि॒धि॒प॒ति॒ ह॒वाम॑हे व॒सो म॑म ॥ 38

TS 7.4.12.1 - Padam

मेषः । त्वा । पचतैः । अवतु । लोहितग्रीव इति लोहित – ग्रीवः ।
छागैः । शल्मलिः । वृद्ध्या । पर्णः । ब्रह्मणा । प्लक्षः । मेधेन ।
न्यग्रोधः । चमसैः । उदुम्बरः । ऊर्जा । गायत्री । छन्दोभिरिति
छन्दः – भिः । त्रिवृदिति त्रि – वृत् । स्तोमैः । अवन्तीः । स्थ ।
अवन्तीः । त्वा । अवन्तु । प्रियम् । त्वा । प्रियाणाम् । वर्षिष्ठम् ।
आप्यानाम् । निधीनामिति नि – धीनाम् । त्वा । निधिपतिमिति
निधि – पतिम् । हवामहे । वसो इति । मम ॥ 38 (36)

(मेषः – षट् त्रिंशत्) (A12)

TS 7.4.13.1

कूप्याभ्यः स्वाहा कूल्याभ्यः स्वाहा विकर्याभ्यः स्वाहा ऽवत्याभ्यः
स्वाहा खन्याभ्यः स्वाहा हद्याभ्यः स्वाहा सूद्याभ्यः स्वाहा
सरस्याभ्यः स्वाहा वैशन्तीभ्यः स्वाहा पल्वल्याभ्यः स्वाहा
वर्ष्याभ्यः स्वाहा ऽवर्ष्याभ्यः स्वाहा ह्रादुनीभ्यः स्वाहा पृष्वाभ्यः

स्वाहा॑ स्य॑न्द॒मा॒नाभ्यः॑ स्वाहा॑ स्था॒व॒राभ्यः॑ स्वाहा॑ ना॒दे॒यीभ्यः॑ स्वाहा॑
सै॒न्ध॒वीभ्यः॑ स्वाहा॑ स॒मु॒द्रि॒याभ्यः॑ स्वाहा॑ सर्वा॑भ्यः स्वाहा॑ ॥ 39

TS 7.4.13.1 - Padam

कू॒प्याभ्यः॑ । स्वाहा॑ । कू॒ल्याभ्यः॑ । स्वाहा॑ । वि॒क॒र्याभ्य॑ इति॑
वि – क॒र्याभ्यः॑ । स्वाहा॑ । अ॒व॒त्याभ्यः॑ । स्वाहा॑ । ख॒न्याभ्यः॑ ।
स्वाहा॑ । ह॒द्याभ्यः॑ । स्वाहा॑ । सू॒द्याभ्यः॑ । स्वाहा॑ । स॒र॒स्याभ्यः॑ ।
स्वाहा॑ । वै॒श॒न्तीभ्यः॑ । स्वाहा॑ । प॒ल्व॒ल्याभ्यः॑ । स्वाहा॑ ।
व॒र्ष्याभ्यः॑ । स्वाहा॑ । अ॒व॒र्ष्याभ्यः॑ । स्वाहा॑ । हा॒दुनी॑भ्य इति॑
हा॒दुनि॑ – भ्यः॑ । स्वाहा॑ । पृ॒ष्वाभ्यः॑ । स्वाहा॑ । स्य॑न्द॒मा॒नाभ्यः॑ ।
स्वाहा॑ । स्था॒व॒राभ्यः॑ । स्वाहा॑ । ना॒दे॒यीभ्यः॑ । स्वाहा॑ । सै॒न्ध॒वीभ्यः॑ ।
स्वाहा॑ । स॒मु॒द्रि॒याभ्यः॑ । स्वाहा॑ । सर्वा॑भ्यः । स्वाहा॑ ॥ 39 (40)

॥
(कू॒प्याभ्य॑ – श्र॒त्वा॒रि॒शत्) (A13)

TS 7.4.14.1

अ॒द्भ्यः॑ स्वाहा॑ व॒ह॒न्तीभ्यः॑ स्वाहा॑ प॒रि॒व॒ह॒न्तीभ्यः॑ स्वाहा॑ स॒म॒न्तं
व॒ह॒न्तीभ्यः॑ स्वाहा॑ शी॒घ्रं व॒ह॒न्तीभ्यः॑ स्वाहा॑ शी॒भं व॒ह॒न्तीभ्यः॑

स्वा॒हो॒ग्रं॑ व॒हन्ती॑भ्यः स्वा॒हा भी॒मं व॒हन्ती॑भ्यः स्वा॒हाऽम्भो॑भ्यः स्वा॒हा
न॒भो॑भ्यः स्वा॒हा म॒हो॑भ्यः स्वा॒हा सर्व॑स्मै स्वा॒हा ॥ 40

TS 7.4.14.1 - Padam

अ॒द्भ्य इ॒त्यत् – भ्यः । स्वा॒हा । व॒हन्ती॑भ्यः । स्वा॒हा ।
प॒रि॒व॒हन्ती॑भ्य इति॑ प॒रि – व॒हन्ती॑भ्यः । स्वा॒हा । स॒म॒न्त॒मि॒ति
सं-अ॒न्तम् । व॒हन्ती॑भ्यः । स्वा॒हा । शी॒घ्रम् । व॒हन्ती॑भ्यः । स्वा॒हा ।
शी॒भम् । व॒हन्ती॑भ्यः । स्वा॒हा । उ॒ग्रम् । व॒हन्ती॑भ्यः । स्वा॒हा ।
भी॒मम् । व॒हन्ती॑भ्यः । स्वा॒हा । अ॒म्भो॑भ्य इ॒त्यम्भः-भ्यः । स्वा॒हा ।
न॒भो॑भ्य इति॑ न॒भः – भ्यः । स्वा॒हा । म॒हो॑भ्य इति॑ म॒हः – भ्यः ।
स्वा॒हा । सर्व॑स्मै । स्वा॒हा ॥ 40 (29)

(अ॒द्भ्य – ए॒का॒त्रि॒ंशत्) (A14)

TS 7.4.15.1

यो अ॒र्वन्तं॑ जि॒घा॒स॒ति त॒म॒भ्यमी॑ति व॒रु॒णः ॥
प॒रो म॑र्तः प॒रः श्वा ॥
अ॒हं च॒ त्वं च॒ वृ॒त्र॒ह॒न्त्सं ब॑भूव स॒नि॒भ्य आ ।

अ॒रा॒ती॒वा चि॒द॒द्रि॒वोऽनु॑ नौ शू॒र म॑स॒तै भ॒द्रा इन्द्र॑स्य रा॒तयः॑ ॥

अ॒भि क्र॑त्वेन्द्र॑ भू॒रध॑ ज॒मन् ते॑ वि॒व्यङ्म॑हि॒मान॑सि ।

स्वे॒ना हि॑ वृ॒त्रस्य॑ श॒वसा॑ ज॒घन्थ॑ न श॒त्रु॒रन्तं॑ वि॒विद॑द् ()

यु॒धा ते॑ ॥ 41

TS 7.4.15.1 - Padam

यः । अ॒र्वन्त॑म् । जि॒घास॑ति । तम् । अ॒भीति॑ । अ॒मीति॑ । व॒रुणः॑ ॥

प॒रः । म॒र्तः । प॒रः । श्वा ॥ अ॒हम् । च॒ । त्वम् । च॒ । वृ॒त्रह॑न्निति॑

वृ॒त्र – ह॒न् । स॒मिति॑ । ब॒भूव॑ । स॒निभ्य॑ इति॑ स॒नि – भ्यः॑ । आ ॥

अ॒रा॒ती॒वा । चि॒त् । अ॒द्रि॒व इत्य॑द्रि – वः । अ॒न्विति॑ । नौ । शू॒र ।

म॑स॒तै । भ॒द्राः । इन्द्र॑स्य । रा॒तयः॑ ॥ अ॒भीति॑ । क्र॑त्वा । इन्द्र॑ ।

भूः । अ॒ध । ज॒मन् । न । ते॑ । वि॒व्यक् । म॒हि॒मान॑म् । रजा॑सि ॥

स्वे॒न । हि॑ । वृ॒त्रम् । श॒वसा॑ । ज॒घन्थ॑ । न । श॒त्रुः । अ॒न्तम् ।

वि॒विद॑त् () । यु॒धा । ते॑ ॥ 41 (52) (वि॒विद॑द् – द्वे च॑) (A15)

TS 7.4.16.1

नमो॑ राज्ञे॑ नमो॑ वरु॑णाय॑ नमो॑ऽश्वाय॑ नमः॑ प्रजा॑पतये॑ नमो॑ऽधिप॑तये॑
ऽधिप॑तिरस्य॑धिपतिं॑ मा कुर्व॑धिपतिर॑हं प्रजा॑नां भूया॑सं मां धेहि॑ मयि॑
धेह्यु॑पाकृताय॑ स्वाहा॑ ऽलब्धाय॑ स्वाहा॑ हुताय॑ स्वाहा॑ ॥ 42

TS 7.4.16.1 - Padam

नमः॑ । राज्ञे॑ । नमः॑ । वरु॑णाय । नमः॑ । अश्वाय॑ । नमः॑ । प्रजा॑पतय॑
इति॑ प्रजा – पतये॑ । नमः॑ । अधिप॑तय इत्यधि॑ – पतये॑ ।
अधिप॑तिरित्यधि॑ – पतिः॑ । असि॑ । अधिप॑तिमित्यधि॑ – पतिम् ।
मा । कुरु॑ । अधिप॑तिरित्यधि॑ – पतिः॑ । अहम् । प्रजा॑नामिति॑
प्र – जानाम् । भूया॑सम् । माम् । धेहि॑ । मयि॑ । धेहि॑ ।
उपा॑कृतायेत्युप – आकृ॑ताय । स्वाहा॑ । आल॑ब्धायेत्या – लब्धाय॑ ।
स्वाहा॑ । हुताय॑ । स्वाहा॑ ॥ 42 (29)

(नम – एकान्न त्रिंशत्) (A16)

TS 7.4.17.1

मयो॑भूर्वातो॑ अभि॑ वातू॑स्रा ऊर्ज॑स्वतीरोष॑धीरा रि॑शन्तां ।
पीव॑स्वतीर्जीव॑धन्याः पिब॑न्त्ववसाय॑ प॒द्वते॑ रुद्र॑ मृड ॥

याः सरूपा विरूपा एकरूपा यासामग्निरिष्ट्या नामानि वेद ।
या अङ्गिरसस्तपसेह चक्रुस्ताभ्यः पर्जन्य महि शर्म यच्छ ॥
या देवेषु तनुवमैरयन्त यासां सोमो विश्वा रूपाणि वेद ।
ता अस्मभ्यं पयसा पिन्वमानाः प्रजावतीरिन्द्र – [] 43

TS 7.4.17.1 - Padam

मयोभूरिति मयः – भूः । वातः । अभीति । वातु । उस्त्राः ।
ऊर्जस्वतीः । ओषधीः । एति । रिशन्ताम् ॥ पीवस्वतीः । जीवधन्या
इति जीव – धन्याः । पिबन्तु । अवसाय । पद्वत इति पत् – वते ॥
रुद्र । मृड ॥ याः । सरूपा इति स – रूपाः । विरूपा इति
वि – रूपाः । एकरूपा इत्येक-रूपाः । यासाम् । अग्निः । इष्ट्या ॥
नामानि । वेद ॥ याः । अङ्गिरसः । तपसा । इह । चक्रुः । ताभ्यः ।
पर्जन्य । महि । शर्म । यच्छ ॥ याः । देवेषु । तनुवम् ।
ऐरयन्त । यासाम् । सोमः । विश्वा । रूपाणि । वेद ॥ ताः ।
अस्मभ्यमित्यस्म – भ्यम् । पयसा । पिन्वमानाः ।
प्रजावतीरिति प्रजा – वतीः । इन्द्र । 43 (50)

TS 7.4.17.2

गो॒ष्ठे रि॒रीहि॑ ॥

प्र॒जाप॑तिर्म॒ह्यमे॒ता ररा॑णो विश्वैर्दे॒वैः पि॒तृभिः॑ सँवि॒दानः॑ ।

शि॒वाः स॒तीरु॑प नो गो॒ष्ठमा॒क॒स्तासां॑ वयं प्र॒जया॑ सꣳ सदे॒म ॥

इ॒ह धृ॑तिः स्वाहे॒ह वि॒धृतिः॑ स्वाहे॒ह रन्तिः॑ स्वाहे॒ह रम॑तिः स्वाहा॑

म॒हीमू॒ षु सु॒त्रामा॑णं ॥ 44

TS 7.4.17.2 - Padam

गो॒ष्ठ इति॑ गो – स्थे । रि॒रीहि॑ ॥ प्र॒जाप॑तिरिति॑ प्र॒जा-प॑तिः । म॒ह्यम् ।

ए॒ताः । ररा॑णः । विश्वैः॑ । दे॒वैः । पि॒तृभि॑रिति॑ पि॒तृ – भिः॑ । सँवि॒दान

इति॑ सं – वि॒दानः॑ ॥ शि॒वाः । स॒तीः । उपे॑ति । नः । गो॒ष्ठमि॑ति

गो – स्थम् । ए॒ति । अ॒कः । ता॒साम् । व॒यम् । प्र॒जये॑ति प्र-जया॑ ।

समि॑ति । स॒दे॒म ॥ इ॒ह । धृ॑तिः । स्वाहा॑ । इ॒ह ।

वि॒धृति॑रिति॑ वि – धृ॑तिः । स्वाहा॑ । इ॒ह । रन्तिः॑ । स्वाहा॑ । इ॒ह ।

रम॑तिः । स्वाहा॑ । म॒हीम् । उ । स्वि॑ति । सु॒त्रामा॑णमि॒ति

सु – त्रामा॑णम् ॥ 44 (38) (इन्द्रा – षात्रिꣳशच्च) (A17)

TS 7.4.18.1

कि॒ञ्च स्वि॑दासीत् पूर्व॑चित्तिः॒ कि॒ञ्च स्वि॑दासीद्-बृ॒हद्वयः॑ ।
कि॒ञ्च स्वि॑दासीत् पि॒शङ्गि॑ला कि॒ञ्च स्वि॑दासीत् पि॒लिप्पि॑ला ॥
द्यौ॑रासीत् पूर्व॑चित्तिरश्च॑ आसीद् बृ॒हद्वयः॑ ।
रा॒त्रि॒रासीत् पि॒शङ्गि॑ला ऽवि॑रासीत् पि॒लिप्पि॑ला ॥
कः स्वि॑देकाकी चरति॑ क उ॒ स्वि॑ज्जायते पुनः॑ ।
कि॒ञ्च स्वि॑द्धिमस्य॑ भेष॒जं कि॒ञ्च स्वि॑दावपनं॑ महत् ॥
सूर्य॑ एकाकी चरति॑ - [] 45

TS 7.4.18.1 - Padam

किम् । स्वि॒त् । आ॒सीत् । पूर्व॑चित्तिरिति॑ पूर्व - चित्तिः॒ । किम् ।
स्वि॒त् । आ॒सीत् । बृ॒हत् । वयः॑ ॥ किम् । स्वि॒त् । आ॒सीत् ।
पि॒शङ्गि॑ला । किम् । स्वि॒त् । आ॒सीत् । पि॒लिप्पि॑ला ॥ द्यौः ।
आ॒सीत् । पूर्व॑चित्तिरिति॑ पूर्व - चित्तिः॒ । अश्चः॑ । आ॒सीत् । बृ॒हत् ।
वयः॑ ॥ रा॒त्रिः । आ॒सीत् । पि॒शङ्गि॑ला । अविः॑ । आ॒सीत् ।
पि॒लिप्पि॑ला ॥ कः । स्वि॒त् । एका॒की । चरति॑ । कः । उ॒ । स्वि॒त् ।

जा॒य॒ते । पु॒नः॑ ॥ कि॒म् । स्वि॒त् । हि॒म॒स्य॑ । भे॒ष॒ज॒म् । कि॒म् ।
स्वि॒त् । आ॒व॒प॒न॒मि॒त्या॑ – व॒प॒न॒म् । म॒ह॒त् ॥ सू॒र्यः॑ । ए॒का॒की॑ ।

च॒र॒ति । 45 (50)

TS 7.4.18.2

च॒न्द्र॒मा जा॒य॒ते पु॒नः॑ ।
अ॒ग्नि॒र्. हि॒म॒स्य॑ भे॒ष॒जं॑ भू॒मि॒रा॒व॒प॒नं॑ म॒ह॒त् ॥
पृ॒च्छा॒मि त्वा॒ पर॒म॒न्तं॑ पृ॒थि॒व्याः पृ॒च्छा॒मि त्वा॒ भु॒व॒न॒स्य॑ ना॒भिं॑ ।
पृ॒च्छा॒मि त्वा॒ वृ॒ष्णो॑ अ॒श्व॒स्य॑ रे॒तः पृ॒च्छा॒मि वा॒चः पर॒मं॑ व्यो॒म ॥
वे॒दि॒माहुः॑ पर॒म॒न्तं॑ पृ॒थि॒व्या य॒ज्ञ॒माहु॑ भु॒व॒न॒स्य॑ ना॒भिं॑ ।
सो॒म॒माहु॑वृ॒ष्णो॑ अ॒श्व॒स्य॑ रे॒तो ब्र॒ह्मै॒व वा॒चः पर॒मं॑ व्यो॒म ॥ 46

TS 7.4.18.2 - Padam

च॒न्द्र॒माः॑ । जा॒य॒ते । पु॒नः॑ ॥ अ॒ग्निः॑ । हि॒म॒स्य॑ । भे॒ष॒ज॒म् । भू॒मिः॑ ।
आ॒व॒प॒न॒मि॒त्या॑ – व॒प॒न॒म् । म॒ह॒त् ॥ पृ॒च्छा॒मि । त्वा॒ । पर॒म् । अ॒न्त॒म् ।
पृ॒थि॒व्याः॑ । पृ॒च्छा॒मि । त्वा॒ । भु॒व॒न॒स्य॑ । ना॒भि॒म् ॥ पृ॒च्छा॒मि । त्वा॒ ।

वृ॒ष्णः । अ॒श्वस्य॑ । रे॒तः । पृ॒च्छामि॑ । वा॒चः । प॒रम॑म् । व्यो॒मेति॑
वि – ओ॒म ॥ वे॒दिम् । आ॒हुः । प॒रम् । अ॒न्तम् । पृ॒थिव्याः॑ ।
य॒ज्ञम् । आ॒हुः । भु॒वन॑स्य । ना॒भिम् ॥ सो॒मम् । आ॒हुः । वृ॒ष्णः ।
अ॒श्वस्य॑ । रे॒तः । ब्र॒ह्म । ए॒व । वा॒चः । प॒रम॑म् ।

व्यो॒मेति॑ वि – ओ॒म ॥ 46 (46)

(सूर्य॑ ए॒काकी॑ च॒रति॑ – षट्च॑त्वारि॒ंशच्च॑) (A18)

TS 7.4.19.1

अ॒ंबे अ॒ंबाल्यं॑बि॒के न मा॑ नयति॒ कश्च॑न ।

स॒सस्त्य॑श्च॒कः ॥

सु॒भगे॑ का॒पील॑वा॒सिनि॑ सु॒वर्गे॑ लो॒के सं प्रो॑र्ण॒वाथां॑ ।

आ॒ऽहम॑जा॒नि गर्भ॑ध॒मा त्वम॑जा॒सि गर्भ॑धं ॥

तौ स॒ह च॒तुरः॑ प॒दः सं प्र॑ सा॒रया॑व॒है ॥

वृ॒षा वा॒ꣳ रे॒तो॒धा रे॒तो द॑धातू॒थ् स॒क्थ्यो॑र्गृ॒दं धै॒ह्यज्जि॑मु॒दज्जि॑म॒न्वज॑ ।

यः स्त्री॑णां जी॒वभो॑जनो॒ य आ॑सां – [] 47

TS 7.4.19.1 - Padam

अ॒ंबे॑ । अ॒म्बालि॑ । अ॒म्बि॑के । न । मा । न॒यति॑ । कः । च॒न ॥
स॒स॒स्ति॑ । अ॒श्व॒कः ॥ सु॒भ॒ग॒ इति॑ सु – भ॒गे । का॒म्पी॑ल॒वा॒सि॒नीति॑
का॒म्पी॑ल – वा॒सि॒नि । सु॒व॒र्ग॒ इति॑ सु॒वः-गे॑ । लो॒के । स॒म् । प्रेति॑ ।
ऊ॒र्ण्वा॒थाम् ॥ एति॑ । अ॒ह॒म् । अ॒जा॒नि । ग॒र्भ॒ध॒मि॒ति॑ ग॒र्भ – ध॒म् ।
एति॑ । त्व॒म् । अ॒जा॒सि । ग॒र्भ॒ध॒मि॒ति॑ ग॒र्भ – ध॒म् ॥ तौ । स॒ह ।
च॒तु॒रः । प॒दः । स॒म् । प्रेति॑ । सा॒र॒या॒व॒है ॥ वृषा॑ । वा॒म् । रे॒तो॒धा इति॑
रेतः – धाः । रे॒तः । द॒धा॒तु । उ॒दि॒ति । स॒क्थ्योः॑ । गृ॒द॒म् । धे॒हि ।
अ॒ज्जि॒म् । उ॒द॒ज्जि॒मित्यु॒त्-अ॒ज्जि॒म् । अ॒न्वि॒ति । अ॒ज ॥ यः ।
स्त्री॒णाम् । जी॒व॒भो॒ज॒न॒ इति॑ जी॒व – भो॒ज॒नः । यः ।

आ॒साम् । 47 (50)

TS 7.4.19.2

बि॒ल॒धा॒व॒नः ।

प्रि॒यः स्त्री॒णाम॑पी॒च्यः ॥

य आ॒सां कृ॒ष्णे॑ लक्ष्म॑णि॒ स॒र्दि॑गृ॒दिं प॒रा॒व॒धीत् ॥

अ॒ंबे अ॒ंबाल्य॑ंबि॒के न मा॑ य॒भति॑ कश्च॒न ।

स॒स॒स्त्य॑श्च॒कः ॥

ऊ॒र्ध्वा-मे॒नामु॑च्छ्र॒यता॑द्-वे॒णुभा॑रं गि॒रावि॑व ।

अथा॑स्या॒ मद्ध्य॑मे॒धता॑ः शी॒ते वा॑ते पु॒नन्नि॑व ॥

अ॒ंबे अ॒ंबाल्य॑ंबि॒के न मा॑ य॒भति॑ कश्च॒न ।

स॒स॒स्त्य॑श्च॒कः ॥

य॒द्धरि॑णी य॒वम॑त्ति न – [] 48

TS 7.4.19.2 - Padam

बि॒लधा॑वन॒ इति॑ बि॒ल – धा॑वनः ॥ प्रि॒यः । स्त्री॒णाम् । अ॒पी॒च्यः ॥

यः । आ॒साम् । कृ॒ष्णे । लक्ष्म॑णि । स॒र्दि॒गृदि॑म् । प॒राव॑धी॒दिति॑

प॒रा – अ॑वधीत् ॥ अ॒म्बे ॥ अ॒म्बालि॑ । अ॒म्बि॒के । न । मा॑ । य॒भति॑ ।

कः । च॒न ॥ स॒स॒स्ति । अ॒श्च॒कः ॥ ऊ॒र्ध्वा॒म् । ए॒ना॒म् । उ॒दि॒ति ।

श्र॒यता॑त् । वे॒णुभा॑रमि॒ति वे॒णु-भा॑रम् । गि॒रौ । इ॒व ॥ अथ॑ । अ॒स्याः ।

मद्ध्य॑म् । ए॒धता॑म् । शी॒ते । वा॑ते । पु॒नन् । इ॒व ॥ अ॒म्बे ॥

अ॒म्बालि॑ । अ॒म्बि॑के । न । मा । य॒भ॒ति॑ । कः । च॒न ॥ स॒स॒स्ति॑ ।

अ॒श्व॒कः ॥ यत् । ह॒रि॒णी॑ । य॒वम् । अ॒त्ति॑ । न । 48 (50)

TS 7.4.19.3

पु॒ष्टं प॒शु म॒न्य॒ते ।

शू॒द्रा य॒दर्य॑जा॒रा न पो॑षाय ध॒नाय॑ति ॥

अ॒ंबे अ॒ंबा॒ल्यं॒बि॒के न मा॑ य॒भ॒ति॑ कश्च॒न ।

स॒स॒स्त्य॑श्च॒कः ॥

इ॒यं य॑का श॒कु॒न्ति॒का ऽऽह॒ल॒मि॒ति॒ सर्प॑ति ।

आ॒हतं॑ ग॒भे प॒सो नि ज॑ल्गुलीति धा॒णि॒का ॥

अ॒ंबे अ॒ंबा॒ल्यं॒बि॒के न मा॑ य॒भ॒ति॑ कश्च॒न ।

स॒स॒स्त्य॑श्च॒कः ॥

मा॒ता च॑ ते पि॒ता च॑ तेऽग्रं वृ॒क्ष॒स्य॑ रो॒हतः॑ () । 49

TS 7.4.19.3 - Padam

पु॒ष्टम् । प॒शु । म॒न्य॒ते ॥ शू॒द्रा । यत् । अ॒र्य॑जा॒रेत्य॑र्य – जा॒रा । न ।

पो॑षाय । ध॒नाय॑ति ॥ अ॒म्बे॑ । अ॒म्बालि॑ । अ॒म्बि॑के । न । मा । य॒भ॒ति॑ ।

कः । च॒न ॥ स॒स॒स्ति॑ । अ॒श्व॒कः॑ ॥ इ॒य॒म् । य॒का । श॒कु॒न्ति॒का ।
आ॒ह॒ल॒मि॒त्या॑-ह॒ल॒म् । इति॑ । सर्प॑ति ॥ आ॒ह॒त॒मि॒त्या॑-ह॒त॒म् । ग॒भे ।
प॒सः । नी॒ति॑ । ज॒ल्गु॒ली॒ति॑ । धा॒णि॒का ॥ अ॒म्बे॑ । अ॒म्बालि॑ ।
अ॒म्बि॒के । न । मा । य॒भ॒ति॑ । कः । च॒न ॥ स॒स॒स्ति॑ । अ॒श्व॒कः॑ ॥
मा॒ता । च॒ । ते॒ । पि॒ता । च॒ । ते॒ । अ॒ग्र॒म् ।
वृ॒क्ष॒स्य॑ । रो॒ह॒तः॑ () ॥ 49 (50)

TS 7.4.19.4

प्र सु॒ला॒मी॒ति॑ ते पि॒ता ग॒भे मु॒ष्टि॒म॒त॒ऽस॒यत् ॥
द॒धि॒क्राव्॒ण्णो॑ अ॒का॒रि॒षं जि॒ष्णो॒रश्व॑स्य वा॒जिनः॑ ।
सु॒र॒भि नो॒ मु॒खा क॒रत् प्र॒ण आ॒यू॒ऽषि॑ ता॒रि॒षत् ॥
आ॒पो हि॒ ष्ठा म॒यो॒भुव॑स्ता न ऊ॒र्जे द॑धातन ।
म॒हे॒र॒णाय॑ चक्ष॒से ॥
यो वः॑ शि॒व॒त॒मो र॒स॒स्त॒स्य॑ भा॒ज॒य॒ते॒ह नः॑ ।
उ॒श॒ती॒रि॒व मा॒तरः॑ ॥

तस्मा॑ अ॒रं ग॒मा॒म वो॒ यस्य॑ क्ष॒या॒य जि॒न्व॒थ () ।

आपो॑ ज॒नय॑था च नः ॥ 50

TS 7.4.19.4 - Padam

प्रेति॑ । सु॒ला॒मि । इति॑ । ते । पि॒ता । ग॒भे । मु॒ष्टि॒म् । अ॒त॒ऽस॒यत् ॥

द॒धि॒क्राव्॑.ण्ण इति॑ द॒धि-क्राव्॑.ण्णः । अ॒का॒रि॒षम् । जि॒ष्णोः । अ॒श्व॒स्य ।

वा॒जिनः॑ ॥ सु॒र॒भि । नः । मु॒खा॑ ॥ क॒रत् । प्रेति॑ । नः । आ॒यू॒ऽषि ।

ता॒रि॒षत् ॥ आ॒पः । हि । स्थ । म॒यो॒भुव॑ इति॑ म॒यः - भुवः॑ । ताः ।

नः । ऊ॒र्जे । द॒धा॒त॒न ॥ म॒हे । र॒णाय॑ । च॒क्ष॒से ॥ यः । वः ।

शि॒व॒त॒म इति॑ शि॒व - त॒मः । र॒सः । त॒स्य । भा॒ज॒य॒त । इ॒ह । नः ॥

उ॒श॒तीः । इ॒व । मा॒तरः॑ ॥ त॒स्मै॑ ॥ अ॒रम् । ग॒मा॒म । वः । य॒स्य ।

क्ष॒या॒य । जि॒न्व॒थ () ॥ आ॒पः । ज॒नय॑थ । च । नः ॥ 50 (54)

(आ॒सा - म॒त्ति न - रो॒हतो॑ - जि॒न्व॒थ - च॒त्वारि॑ च) (A19)

TS 7.4.20.1

भूर्भुवः सुवर्वसवस्त्वा ऽञ्जन्तु गायत्रेण छन्दसा रुद्रास्त्वा ऽञ्जन्तु
त्रैष्टुभेन छन्दसा, ऽदित्यास्त्वा ऽञ्जन्तु जागतेन छन्दसा यद्-वातो
अपो अगमदिन्द्रस्य तनुवं प्रियां ।

एत७ स्तोतरेतेन पथा पुनरश्वमा वर्तयासि नः ॥

लाजी(३)ञ्छाची(३)न् यशो ममाँ(४) ।

यव्यायै गव्याया एतद्-देवा अन्नमत्तैतदन्नमद्धि प्रजापते ॥

युञ्जन्ति ब्रद्धन् ()-मरुषं चरन्तं परि तस्थुषः ।

रोचन्ते रोचना दिवि ॥

युञ्जन्त्यस्य काम्या हरी विपक्षसा रथे ।

शोणा धृष्णू नृवाहसा ॥

केतुं कृण्वन्नकेतवे पेशो मर्या अपेशसै ।

समुषद्भिरजायथाः ॥ 51

TS 7.4.20.1 - Padam

भूः । भुवः । सुवः । वसवः । त्वा । अज्जन्तु । गायत्रेण । छन्दसा ।
रुद्राः । त्वा । अज्जन्तु । त्रैष्टुभेन । छन्दसा । आदित्याः । त्वा ।
अज्जन्तु । जागतेन । छन्दसा । यत् । वातः । अपः । अगमत् ।
इन्द्रस्य । तनुवम् । प्रियाम् ॥ एतम् । स्तोतः । एतेन । पथा । पुनः ।
अश्वम् । एति । वर्तयासि । नः ॥ लाजी(3)न् । शाची(3)न् । यशः ।
ममा(4)म् ॥ यव्यायै । गव्यायै । एतत् । देवाः । अन्नम् । अत्त ।
एतत् । अन्नम् । अद्धि । प्रजापत इति प्रजा – पते ॥ युज्जन्ति ।
ब्रध्नम् () । अरुषम् । चरन्तम् । परीति । तस्थुषः ॥ रोचन्ते ।
रोचना । दिवि ॥ युज्जन्ति । अस्य । काम्या । हरी इति । विपक्षसेति
वि – पक्षसा । रथे ॥ शोणा । धृष्णू इति । नृवाहसेति नृ-वाहसा ॥
केतुम् । कृण्वन् । अकेतवै । पेशः । मर्याः । अपेशसे ॥ समिति ।
उषद्विरित्युषत् – भिः । अजायथाः ॥ 51 (75)

(ब्रध्नं – पञ्चविंशतिश्च) (A20)

TS 7.4.21.1

प्रा॒णाय॒ स्वाहा॑ व्या॒नाय॒ स्वाहा॑ ऽपा॒नाय॒ स्वाहा॑ स्ना॒वभ्यः॑ स्वाहा॑
सं॒ताने॑भ्यः स्वाहा॑ परि॒सं॒ताने॑भ्यः स्वाहा॑ पर्व॑भ्यः स्वाहा॑
सं॒धाने॑भ्यः स्वाहा॑ शरी॑रेभ्यः स्वाहा॑ य॒ज्ञाय॒ स्वाहा॑ दक्षि॑णाभ्यः
स्वाहा॑ सु॒वर्गाय॒ स्वाहा॑ लो॒काय॒ स्वाहा॑ सर्व॑स्मै स्वाहा॑ ॥ 52

TS 7.4.21.1 - Padam

प्रा॒णाय॑ेति प्र – अ॒नाय॑ । स्वाहा॑ । व्या॒नाय॑ेति वि – अ॒नाय॑ । स्वाहा॑ ।
अ॒पा॒नाय॑ेत्यप – अ॒नाय॑ । स्वाहा॑ । स्ना॒वभ्य॑ इति स्ना॒व – भ्यः॑ ।
स्वाहा॑ । सं॒ताने॑भ्य इति सं – ता॒नेभ्यः॑ । स्वाहा॑ । परि॒सं॒ताने॑भ्य
इति परि – सं॒ताने॑भ्यः । स्वाहा॑ । पर्व॑भ्य इति पर्व॑-भ्यः । स्वाहा॑ ।
सं॒धाने॑भ्य इति सं – धा॒नेभ्यः॑ । स्वाहा॑ । शरी॑रेभ्यः । स्वाहा॑ ।
य॒ज्ञाय॑ । स्वाहा॑ । दक्षि॑णाभ्यः । स्वाहा॑ । सु॒वर्गाय॑ेति सु॒वः – गा॑य ।
स्वाहा॑ । लो॒काय॑ । स्वाहा॑ । सर्व॑स्मै । स्वाहा॑ ॥ 52 (28)

(प्रा॒णाय॑ – षा॒वि॒शतिः॑) (A21)

TS 7.4.22.1

सिताय॑ स्वाहा॑ ऽसिताय॑ स्वाहा॑ ऽभिहि॑ताय॒ स्वाहा॑ ऽन॑भिहि॒ताय॒ स्वाहा॑
यु॒क्ताय॑ स्वाहा॑ ऽयु॒क्ताय॑ स्वाहा॑ सुयु॒क्ताय॑ स्वाहो॑ – द्यु॒क्ताय॑ स्वाहा॑
विमु॒क्ताय॑ स्वाहा॑ प्रमु॒क्ताय॑ स्वाहा॑ वञ्च॑ते स्वाहा॑ परि॒वञ्च॑ते स्वाहा॑
सँवञ्च॑ते स्वाहा॑ ऽनु॒वञ्च॑ते स्वाहो॑द् – वञ्च॑ते स्वाहा॑ य॒ते स्वाहा॑
धा॒वते॑ स्वाहा॑ तिष्ठ॑ते स्वाहा॑ सर्व॑स्मै स्वाहा॑ ॥ 53

TS 7.4.22.1 - Padam

सिताय॑ । स्वाहा॑ ॥ अ॒सिताय॑ । स्वाहा॑ ॥ अ॒भिहि॑तायेत्यभि – हि॒ताय॑ ।
स्वाहा॑ ॥ अ॒न॒भिहि॑तायेत्यन॒भि – हि॒ताय॑ । स्वाहा॑ ॥ यु॒क्ताय॑ । स्वाहा॑ ॥
अ॒यु॒क्ताय॑ । स्वाहा॑ ॥ सुयु॒क्तायेति॑ सु – यु॒क्ताय॑ । स्वाहा॑ ॥
उ॒द्यु॒क्तायेत्युत् – यु॒क्ताय॑ । स्वाहा॑ ॥ विमु॒क्तायेति॑ वि – मु॒क्ताय॑ ।
स्वाहा॑ ॥ प्रमु॒क्तायेति॑ प्र – मु॒क्ताय॑ । स्वाहा॑ ॥ वञ्च॑ते । स्वाहा॑ ॥
प॒रि॒वञ्च॑त इति॑ प॒रि – वञ्च॑ते । स्वाहा॑ ॥ सँवञ्च॑त इति॑
सं – वञ्च॑ते । स्वाहा॑ ॥ अ॒नु॒वञ्च॑त इत्यनु॑ – वञ्च॑ते । स्वाहा॑ ॥
उ॒द्वञ्च॑त इत्युत् – वञ्च॑ते । स्वाहा॑ ॥ य॒ते । स्वाहा॑ ॥ धा॒वते॑ । स्वाहा॑ ॥

तिष्ठते॑ । स्वाहा॑ ॥ सर्व॑स्मै । स्वाहा॑ ॥ 53 (38)

(सिताया॑ – षात्रि॑ञ्शत्) (A22)

Prasna Korvai with starting Padams of 1 to 22 Anuvaakams :-

(बृह॑स्पतिः॒ श्रद् – यथा॑ वा – ऋ॒क्षा वै – प्र॒जाप॑तिर्ये॒नये॑न – द्वे
वाव॑ दे॒वस॑त्रे – आ॒दित्या॑ अ॒काम॑यन्त सु॒वर्गं – व॑सिष्ठः –
सँव॑त्सराय॑ – सु॒वर्गं यै॑ स॒त्रं – ब्र॒ह्मवा॑दिनोऽति॒रात्रो – ज्योति॑ष्ठोमं
– मे॒षः – कू॒प्याभ्यो॑ – ऽद्भ्यो॑ – यो – नमो॑ – मयो॒भूः –
किञ्च॑ स्वि॒द – म्बे – भूः – प्रा॒णाय॑ – सि॒ताय॑ – द्वावि॑ञ्शतिः)

Korvai with starting Padams of 1, 11, 21 Series of Panchaatis :-

(बृह॑स्पतिः॒ – प्रति॑ तिष्ठन्ति – वै द॑शरा॒त्रेण॑ – सु॒वर्गं – यो॑ अ॒र्वन्तं
– भू – स्त्रि॑पञ्चा॒शत्)

पद पाठे (वाक्य सहित) – सप्तमकाण्डे – चतुर्थः प्रश्नः

First and Last Padam of Fourth Prasnam of 7th Kandam

(बृ॒ह॒स्प॒तिः – सर्व॑स्मै॒ स्वाहा॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे सप्तमकाण्डे

चतुर्थः प्रश्नः समाप्तः ॥

पद पाठे (वाक्य सहित) – सप्तमकाण्डे – चतुर्थः प्रश्नः

Details of Panchati and Padam for Kandam 7, Prasanam 4 (TS 7.4)

	Panchati	Padams
Anuvakam 1	3	145
Anuvakam 2	5	274
Anuvakam 3	6	299
Anuvakam 4	3	172
Anuvakam 5	4	217
Anuvakam 6	3	136
Anuvakam 7	3	172
Anuvakam 8	3	134
Anuvakam 9	1	50
Anuvakam 10	2	99
Anuvakam 11	4	208
Anuvakam 12	1	36
Anuvakam 13	1	40
Anuvakam 14	1	29
Anuvakam 15	1	52
Anuvakam 16	1	29
Anuvakam 17	2	88
Anuvakam 18	2	96
Anuvakam 19	4	204

पद पाठे (वाक्य सहित) – सप्तमकाण्डे – चतुर्थः प्रश्नः

Anuvakam 20	1	75
Anuvakam 21	1	28
Anuvakam 22	1	38
Total →	53	2621

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in